

萬 有 文 庫

第 二 集 七 百 種

王 雲 五 主 編

宋 詩 紀 事

( 二 十 )

厲 鶚 馬 日 瑄 輯

商 務 印 書 館 發 行

宋 詩 紀 事

(二十)

馬 日 瑄 輯

國 學 基 本 叢 書

萬有文庫

第二集七百種

總編 吳 哲

王 雲 五

商務印書館發行

宋詩紀事卷七十九

張 琰

琰字汝玉廣陵人身七尺長髯有節概補州牙兵隨制置李庭芝潰圍南赴行在所追者及之麾  
下鳥獸散琰獨鬪死

出塞曲

腰閒插雄劍中夜龍虎吼平明登前途萬里不回首男兒當野死豈爲印如斗忠誠表壯節燦爛千古後  
朝發山陽去暮宿清水頭上馬左右射捷下如獼猴先發服勇決手提血髑髏兵家互勝負凡百慎前籌  
官柳

不見樓東黃布帘樹猶如此我何堪裊裊亭亭忒無賴又將春色誤江南以上谷音

熊與蘇

與蘇字天樂豫章人性介澹無妻不食肉通經史百氏之書布衣草屨遨遊諸名山尤嗜彈琴草  
書

唐元宗鐵像

錢唐厲鶚緝

平湖鮑勳勘定



巍冠攢疊碧雲花。坐閱山中幾歲華。莫把金丹輕點化。正愁生死困安家。

木平飼龍亭次韻方巨山

耳見何如得眼聞。山根磅礴極初分。浮漚起滅自潭影。大地晴陰空嶺雲。何處老人來聽講。他年少府有移文。由來清調須吾輩。幸不山王媿五君。以上谷音。

晏父

父字明粲。宜春人。風度秀整。主趙崇灑。後灑逮繫。父自請詣獄。俱以瘵死。

訪吳

平生一語不冒吐。浩然披髮行西林。美人十日跨驢出。黃葉堆門雲雪深。

夢中

春樹年年少。寒雲浦浦連。片帆高浪起。斗酒夕陽偏。沙市懷司馬。州城笑老邊。太平冠蓋盡。爾敢望諸賢。

以上谷音

楊應登

應登字幼平。臨江人。寬厚長者。有德行言辭。七試國子不第。退就耕牧。老于南塘。

水宿

水宿逢今雨。春歸返故園。聖朝臣已老。往事客何言。乞米分鄰里。看書到子孫。蒼茫不可會。一笑了清樽。

寄趙梅州

江城雁叫天如水。寒色蒼蒼草木死。哀歌未斷月東出。有才無命可流涕。今我不樂思梅州。束帶深衣白僚底。天下規矩見卓絕。龍章麟角諸公子。白頭時節得蠻府。歸來閉門呼不起。惆悵平生狗馬病。風后力牧長已矣。爲公間酒日日酤。熏天富貴憂患始。以上谷音。

楊 雯

雯字天章。應登之孫。

迢迢空同山

迢迢空同山。乃在西極巔。玉泉蔭靈芝。上有千歲仙。安得凌風翼。相從白雲間。神仙本冥漠。天運仍推遷。不如酌我酒。或得成自然。田父要我語。飲者亦非賢。願君長獨醒。加餐足高年。

宋武帝廟

溪聲答松風。巨石出老拳。古樹不知名。岌岌蛟龍纏。夕陰互出沒。秋華帶芳鮮。蔥蔥帝王氣。棟宇垂千年。虎賁秉霜戟。慘澹生雲烟。宮人翠龍駕。手持玉連蜷。昌明坐恍惚。精神露在天。大呼司雍閒。旬月無秦燕。昔爲萬夫特。今受衆目憐。石馬亦埋沒。歲時草芊芊。小臣異代士。見之淚迸泉。齊人思爽鳩。蜀人哀杜鵑。江東舊正朔。禮奉敢不虔。但願君王心。不忘載荻船。下山又再拜。白日當空懸。

北客

北客相催發。一日舉千帆。遙憐庾開府。歲晚望江南。

宿峽市

人烟正搖落，樓笛頗清圓。老樹依山驛，東風上峽船。江湖萬里外，燈火十年前。世路能令老，吾生且醉眠。  
早春

不知何處碧雲鄉，冉冉平生可斷腸。怪底乾坤惟理在，老來歲月更心長。城頭急鼓千家夢，江上殘梅一  
水香。自作醉侯開醉國，笑人奔走爲誰忙。以上谷音。

趙卯發

卯發，昌州人。通判池州。權州事。元兵至，同妻雍氏縊死。

裂衣書詩寄弟

城池不高深，無財又無兵。惟有死報國，來生作弟兄。昭忠逸詠注。

唐珏

珏，字玉潛，號菊山，會稽人。

冬青行

馬箠間饒行，南面欲起語。野鷹尙屯束，何物敢盜取。餘花拾飄蕩，白日哀后土。六合忽怪事，蛻龍挂茅宇。  
老天鑿區區，千載護風雨。

冬青花，不可折。南風吹涼積香雪，遙遙翠蓋萬年枝。上有鳳巢下龍穴，君不見犬之年，羊之月，霖霖一聲  
天地裂。

夢中作。曰：瑄按遂昌雜錄，作林景熙。今從輟耕錄作珏詩。

珠亡忽震蛟龍睡。軒弊寧忘犬馬情。親拾寒瓊出幽草。四山風雨鬼神驚。  
一坏自築珠丘土。雙匣親傳竺國經。獨有春風知此意。年年杜宇哭冬青。  
昭陵玉匣走天涯。金粟堆寒起暮鴉。水到蘭亭轉嗚咽。不知眞帖落誰家。  
珠冕玉雁又成埃。斑竹臨江首重回。猶憶年時寒食節。天家一騎奉香來。

輟耕錄。歲戊寅。有總江南浮屠者。楊連真伽。怙恩橫肆。勢燄燄人不可具狀。十二月十有二日。帥徒役頓蕭山。發趙氏諸陵寢。至斷殘支體。擲珠襦玉柙。焚其鬻棄骨草莽間。時年三十二歲。聞之。痛憤。亟貨其家。具得白金百星許。執券行貸。得白金又百星許。乃具酒釀。市羊豕。邀里中少年若干輩。狎坐轟飲。酒且酣。少年起請曰。君儒者。若是將何爲焉。唐慘然。具以告。願收遺骸共瘞之。衆謝曰。諾。中一少年曰。發丘中郎將。耽耽餓虎。事露奈何。唐曰。余固壽矣。今四郊多暴骨。取竄以易。誰復知之。乃斷文木爲匱。覆黃絹爲囊。各署其表曰。某陵某陵。分委而散遺之。絕地以藏。爲文而告。詰且事訖。來集。出白金羨餘以酬。戒勿泄。越七日。總浮屠下令。哀陵骨。雜置牛馬枯骼中。築一塔壓之。名曰鎮南。杭民悲切。不忍仰視。了不知陵骨之獨存也。禍淫不爽。流傳京師。上達四聰。天怒赫赫。飛風雷鞭令。掉首禍者北焉。山陰人始有籍籍傳唐氏者。由是唐之義風。震動吳越。聲生勢長。若胥江掀八月之濤。名雖高。困固自若。明年己卯。後上元兩日。唐出觀燈。歸忽坐隕。息奄奄者將絕者。良久始蘇。曰。吾見黃衣吏持文書來告曰。王召君。導之往。觀闕巍峨。宮宇靚麗。殆非人世間。有一冕旒。坐殿上。數黃衣貴人。遶巡降揖曰。藉君掩骸。其有以報唐乃。陞謁造王前。王謂曰。汝受命寢且貧。兼無妻若子。今忠義動天帝。命賜汝伉儷。子三人。田三頃。拜謝降出。遂覺。罔不知其何也。踰時。越有治中袁俊齋至。始下車。爲子求師。有以唐薦者。一見置賓館。一日問曰。吾渡江。聞有唐氏。瘞宋諸陵骨。子豈其宗耶。左右指君曰。此是已。袁大駭。拱手曰。君此舉。豫讓不能抗也。曳之坐北面。而納拜焉。禮敬特加。情款益篤。叩知家。

徒四壁惻然嗟矜語左右曰唐先生家甚寒吾當料理使有妻有田以給左右逢迎爰諏爰度不數月二事俱備聘婦偶故國之公女貧郭食故國之公田所費一一自袁出人固奇唐之節而又奇唐之遇兩高之曰二公真義士爾後獲三丈夫子鼎立願願凡夢中神所許稽其數無一不合咄咄怪事乃如此唐葬骨後又于宋常朝殿掘冬青樹植于所函土堆上有詩云

### 王英孫

英孫字才翁一作子才號脩竹會稽人少保端明殿學士克謙之子仕將作監主簿家饒于貲宋亡後延致四方名士賦詠相娛與山陰徐受之天祐並爲一時人士所宗

林霽山王脩竹詩序云予數從公游嘯吟泉石每一篇出有飛出宇宙之概已而斂入絲粟寂乎無聲使人三歎不能已

### 岳武穆王墓

埋骨西湖土一丘殘陽荒草幾經秋中原望斷因公死北客猶能說舊愁武林舊事

### 題高房山夜山圖

等閑吳越在毫端疊巘微茫月影寒一曲危闌人獨倚江山渾在夢中看鐵網珊瑚

### 寶林寺

飛來幾千載臺殿壓宮堦落日飛仙鼠秋風下健鷗山腰微露石海眼暗通潮堪歎元英後詩名竟寂寥

感



陳觀國

觀國字用賓。會稽人。王脩竹監簿之友。

送鄧牧心出陶山

青山無送迎。幽人自來去。落葉若相送。卷卷及行屨。簷端有孤雲。仍爲守其處。落葉惜人不在山。孤雲尙期人再還。斯人可期復可惜。我處落葉孤雲間。吳禮部詩話

柴元彪

元彪字炳中。號澤耀居士。官察推。有轍線集。

錢唐懷古

百年朝市舊。登覽若爲情。落日銅駝陌。東風夾馬營。路隨荆棘斷。城與黍離平。可惜西湖月。燒燈兩度晴。

僧房夜冷

山冷沒禁當。那堪更漏長。寒欺秋後扇。風試夜來霜。茭白心如墨。冬青子亦黃。祇宜煨芋栗。齧引對緇郎。

秋日江郎道中

豆花疎雨澗輕埃。野店新涼入酒杯。草帶斷烟棲古道。樹含殘靄翳荒臺。湖光隱見萍分合。山色有無雲去來。滿眼秋光無盡意。三峯萬古碧崔嵬。

灌花

小圃辛勤植衆芳。年年雨露借恩光。近來天氣高難問。抱甕從朝到夕陽。

上中齋相公

年年長是客天涯。幾向天涯夢到家。歸到故家無一事。免葵黷粟正開花。以上柴氏四隱集

黃庚

庚字星甫。天台人。嘗客山陰。王脩竹監簿家。與嚴陵胡天放。永嘉林霽山遊。越中詩社試枕易題。推爲第一。有月屋漫橐。

王脩竹館舍卽事

池館翠涼處。寬閑稱客居。未仙猶閬苑。不夢亦華胥。竹淨堪居鶴。荷香欲醉魚。心清無箇事。長日一編書。

秋色山陰詩社中選

憑高望不極。望斷動愁情。落日淒涼處。西風點染成。丹楓明野驛。白水浸江城。馬上人回首。戎戎點客程。

鶴林仙壇寺

古壇歸鶴杳。野鹿自成羣。嵐氣浮清曉。鐘聲出白雲。樹穿僧屋老。水到寺門分。人世無窮事。山中了不聞。

見雁有懷

滿眼西風憶故廬。親朋音問久相疎。年年江上無情雁。只帶秋來不帶書。

枕易越中詩社試題都魁

古鼎烟銷倦點朱。籊然高臥夜寒初。四簷寂寂半牀夢。兩鬢蕭蕭一卷書。日月冥心知代謝。陰陽回首驗盈虛。起來萬象皆吾有。收拾乾坤在草廬。

舟次擣菹廟

短檝衝寒過浦東。扁舟一葉載詩翁。斷烟流水殘鴉外。古木荒祠夕照中。吟罷小樓何處笛。酒醒孤枕半江風。潮生潮落朝還暮。堪歎浮生似轉蓬。

偶書

頻年蹤跡墮江湖。三徑苔荒憶舊廬。身老方知生計拙。家誰漸覺故人疎。松薪拾去朝炊黍。漁火分來夜讀書。怨鶴驚猿應待我。台山何日賦歸歟。以上月屋漫藁。

顧逢

逢字君際。吳郡人。宋末舉進士。不第。學詩于周弼。稱顧五言。自署其居爲五字田家。後辟吳縣學官。別號梅山樵叟。有船窗夜話。負暄雜錄及詩集。

善權寺

英臺讀書地。舊刻字猶存。一閣出霄漢。萬松連寺門。洞深雲氣冷。池淺鹿行渾。山下流來水。風雷日夜喧。宜興縣志。

早秋湖上

藕花香裏去。獨坐自尋詩。秋意在何處。夕陽將下時。鳥幽忘立久。山好覺行遲。飲興忽然動。橋邊有酒旗。雪中同鄭所南訪趙溪梅

移宅雖然遠。攜筇到兩回。只知相別去。不道又重來。溪鯽和冰煮。鄰醅帶雪開。詩家堪入畫。滿眼玉樓臺。

以上珊瑚木難

林 同

同字子真。號空齋處士。福清人。以世澤授官。棄不仕。元兵至福州。監丞劉全子糾義兵。卽其家置忠義局。敵至同死之。有孝詩一卷。

劉後村跋。子真性純孝。父寒齋病。左右侍湯藥。至不忍入州。應舉嘗赴胄試。自里抵家。得詩一卷。十之九皆思親之言。年未四十。慨然罷舉。志尤潔。非躬耕不食。植梅百株。日哦其下。

魏孝子 役于大國。陟彼岵兮。瞻望母兮。狄仁傑登山望雲曰。吾親舍其下。

念母嗟陟岵。思親徒望雲。可憐魏孝子。不比狄參軍。

韓伯瑜母杖不痛。哀母力弱。對母悲泣。梁彥先使焦通觀其像。通感悟。盡孝。

母力今衰矣。悲啼得杖輕。流風在繪像。猶足感焦生。

徐庶辭先主曰。老母見獲。方寸亂矣。王陵母曰。爲語陵。毋以老妾故。持二心。

不勝方寸亂。豈暇二心持。忍矣王陵將。賢哉徐庶辭。

桓沖小子買德郎。母病須羊以解。以身質羊。後爲江州刺史。

不辭身作質。只爲母須羊。此日江州牧。當年買德郎。

文中子汾水之曲。有先人之敝廬。在有田。可以具饘粥。彈琴著書。不願仕也。

先人舊所理。汾曲有田廬。何意求聞達。彈琴自著書。

王悅 導之子。有高名。事親色養。諸子莫及。導見輒有喜色。

色養傾餘子。高名重一時。足爲丞相喜。豈計外人知。

木蘭 古樂府云。阿爺無大兒。木蘭無長兄。願爲市鞍馬。從此替爺征。

謹勿悲生女。均之有至情。縈能贖父罪。蘭亦替爺征。以上孝詩。

陳巖

巖字清隱。青陽人。生宋末。有九華詩集。

會仙峯 在九華中峯之側。趙知微嘗中秋遇雨。率其徒登峯。上月出雲淨。諸峯早露。及歸。復雨。因名之。

仙袂飄飄拂翠巔。知微來此宴羣仙。人閒風雨山閒月。始信仙家別有天。

碧桃巖

自要貪閑非避秦。洞門隔斷世閒塵。山中不置四時歷。開到碧桃知是春。以上九華山志。

馬南寶

南寶。香山人。景炎二年。端宗航海過邑。獻粟千石。拜權工部侍郎。宋亡。于厓山被執。死之。

句

目擊厓門天地改。寸心難與夜潮消。衆星耿耿滄溟底。恨不同歸一少微。廣東通志。

王奕

奕字伯敬。玉山人。官本州教授。自號玉斗山人。有東行斐稿。



絕句呈周日湖

草帶黏天只辨星。燈樓盡化作郵亭。柳橋梅驛多來使。只寄山中養鶴經。玉斗山人集

送謝疊山先生北行

皇天久矣眼垂青。盼盼先生此一行。遺表不隨諸葛死。離騷長伴屈原清。兩生無補秦興廢。一出仍關魯重輕。白骨青山如得所。何須兒女哭清明。西江詩話

何行

行字自強。廣昌人。生宋末。爲武平令。

題龍泉觀

蓬萊境界隔風烟。一帶銀河接九天。禮斗瑤臺春草合。窠龍石鉢玉沙圓。紅雲幾片危樓上。古木千尋落照邊。惆悵仙人何處去。空餘月色滿山川。西江詩話

吳侗

侗字尙賢。歙人。有漁磯脞語。

句

舊聞有西山。松風六月寒。明當整襟屨。舒笑青雲端。招手塵外人。淪泉采芳蓀。夏畧 方回桐江集

江凱

凱字伯幾。號雪缸。婺源旃陀人。許山屋之客。山屋愛之。妻以子。

相士俞方塘

方塘之鑒形可識。方諸之鑑心始得。相形何如更論心。以貌取人當有失。君不見虞皇項籍兩重瞳。成湯曹交皆九尺。新安文獻志

汪炎昶

炎昶字懋遠。婺源人。紫巖族孫。有古逸民詩集。

趙東山云古逸先生詩微婉

適勁亦時出于悲壯激烈

書興

時時溪上行。或與幽人遇。手把一編書。共倚崖邊樹。鷺近始暫飛。魚驚卻重聚。佳景不待求。足熟自知處。稚子愛相隨。似亦耽幽趣。

香巖院

犖确疲幽徑。扶持仗瘦筇。斷崖何處路。細雨隔山鐘。猿竊重簾果。僧樵臥澗松。人言深僻處。別更有靈蹤。

南山

宣平隱處今始過。烟霞城郭路幾何。野渡誰浮夕陽艇。空山尚響樵人歌。石壇荒涼疊苔蘚。谷鳥嗚嘶深松蘿。何當更值買酒至。一笑使我朱顏酡。

聞笛

荒村犬吠人猶行，驚鳥亂啼山月明。南鄰擣砧適復罷，何處吹笛秋更清。疑含白龍堆外怨，不恨黃鶴樓中聽。螢飛露下百草溼，倚風激烈思平生。

過往歲避地之所，屋毀人遷。

依舊蒼苔小徑斜，當時從此入山家。心疑謬誤還疑是，雨溼棠梨一樹花。以上新安文獻志。

黃誠性

挽文丞相

三百餘年樂育恩，晚從科目得斯人。崎嶇嶺海期年國，零落氈毛萬死身。諸葛未亡猶有漢，包胥欲泣更無秦。挑燈恍慨歌梁父，鬢髮蕭森懷鬼神。吳禮部詩話。

葉林

林，字儒藻，一字元文，一作去文，號本山，錢唐人。生宋末，隱大滌山，沖天觀，與鄧牧深相得，或欲薦之朝，聞其清議而止。大德丙午，書偈案上，泊然而化，衆稱高行先生。

至道宮

猶存巨鑊記熙豐，翠藹春深古路通。千百春鋤一株樹，野田飛下雪花風。洞霄圖志。

石室洞

低垂石室洞，杖屨易躋攀。有路穿雲窟，無門對月關。誰騎仙鹿去，我笑國螭跽。若使今猶昨，清宵聞佩環。

又登石室作

遠游貞白二仙家。今日追尋路不賒。七十二叢秋色裏。有人曾約去看花。  
石徑春深疊古苔。洞天無鑰爲誰開。白雲本是無心物。風趁松花作雨來。以上洞霄詩集。

鄧剡

剡字光薦。號中齋。廬陵人。祥興時。歷官禮部侍郎。丞相文信公客也。厓山兵潰。爲張弘範所得。教其次子得放還。有中齋集。

挽文信公詩

憶公淚懸河。九地無處瀉。想公騎赤龍。請命蒼梧野。世人醉生死。翻笑獨醒者。焉知千載英。精爽皎不夜。義士無廢興。時運有代謝。念昔喪亂初。公騎使君馬。奮袂起勤王。慨慨淚盈把。須臾三萬衆。如自九天下。燈棊書檄交。笑語雜悲咤。捧土障洪河。一繩維大廈。至哉朝宗性。百折終不舍。身北冠自南。血碧心冒化。顏鉤凜忠勁。杜詩蔚騷雅。晉陽骨肉冤。東市刀兵解。精誠揭天日。氣魄動夷夏。丈夫如此何。一死尤足怕。田橫老賓客。白髮餘息假。有時夢巖電。意悟當飄灑。非無中丞傳。殺青自誰寫。魂歸哀江南。千秋俎鄉社。吳禮部詩話。

鷓鴣詞

行不得也哥哥。瘦妻弱子羸牯。天長地闊多網羅。南音漸少北語多。肉飛不起可奈何。行不得也哥哥。遂昌雜錄。

步月

宋詩紀事 卷七十九

一九五七

盈盈當春月，含情隔幽樞。好懷不自制，起坐可一庭。百蟲未敢怨，卉木正蔥菁。餘光散草露，乃復似秋螢。  
夜聞雨聲歸思浩然

西風響高樹，鄉夢去帆前。稚子衡門下，先塋亂葉邊。老來多一出，歸去恰經年。海燕巢何晚，秋期落爾先。  
午坐後亭

隔簾遲日午風微，社燕驚寒未肯歸。讀了丹經成默坐，時時一片杏花飛。

望夫山

朝望夫，暮望夫。一夕化作山石枯。潮水去卻回，行人來不來。以上天下同文集。

題龍山鐘

豐山背後鐘，霜日平原定。夜半響鯨音，隱隱天地應。山靈鶴夢醒，獨聽還獨詠。蕭蕭蓬蒿中，收入杜陵徑。

青原山志。

避亂至烏巖山贈承節趙公

山在香山縣東南。

流水桃花又避秦，誅茅西崦結爲鄰。如公尙友浮丘伯，顧我早師梅子真。碁酒從容新里社，衣冠蕭散古遺民。他年史傳收芳跡，應許牽聯作隱人。廣東通志。

甘泳

泳字泳之，一字中夫。崇仁人。生宋末。工詩。不娶。有東溪集。

自述



總角希聞道，殘生乃付詩。未曾前輩識，敢辱近人知。飄泊身餘健，蕭閑鬢欲衰。一簾書四壁，寒日在清池。

過南湖

忽有一事礙胸次，擺脫不去呼酒來。溟溟濛濛混沌在，坦坦蕩蕩虛空開。精神一生留筆墨，形骸昨夜爲尊壘。年年看梅今白髮，晴日江路行莓苔。以上天下同文集。

林 昉

昉三山人。

送西秦張仲實遊大滌洞天

此時仙興發，九鎖訪名峯。玉洞晝飛鼠，石池春浴龍。異人花外見，道士酒邊逢。余欲采芳茗，白雲何所從。

洞霄詩集。

羅公升

公升字時翁，吉之永豐人。大父開禮，從文丞相勤王，兵敗被執，不食死。公升以軍功授本邑尉。北游圖恢復，不果，有滄洲先生集。

秋懷

舊日方山子，淒涼寄一簾。蟲聲來倦枕，秋思入凭闌。已是肱三折，那堪指一彈。中宵更風雨，誰念客氈寒。

避地

雨急啼鴉切，山昏去客奔。竄身楚南極，獨立鄭東門。卜處無神效，招餘有斷魂。死生毫髮事，不足累乾坤。

四海風濤日。誰歟柱急流。山東雄劇孟。薊北化田疇。氣靜天闈晚。星沈戍角秋。如君關氣數。寧不重離憂。

演福寺 賈妃葬處

緯翟當年讓福人。妃與謝后俱入宮。穆陵主意于賈。楊太后曰。謝家有福。遂立謝后。早亡何用羨長春。帝鄉坏土真無憾。愁絕龍沙萬里身。以上滄州集。

# 宋詩紀事卷八十

鄭思肖

思肖字憶翁號所南福州連江人太學上舍應博學宏詞科元兵南下叩關上太后幼主疏辭切直忤當路不報遂客吳下寄食城南報國寺以終有錦錢集一百二十四圖詩集咸淳集中興集

輟耕錄先生剛介有立志會天兵南叩關上疏犯新禁衆爭目之由是遂變名曰肖曰南義不忘趙北面他姓也隱居吳下一室蕭然坐必南向歲時伏臘望南野哭而再拜乃返人莫識焉工畫墨蘭不妄與人邑宰求之不得聞先生有田三十畝因脅以賦役取先生怒曰頭可斫蘭不可得過齊子芳之書塾云此世但除君父外不會別受一人恩寒菊云禦寒不藉水爲命去國自同金鑄心其忠肝義膽于此可見

遺民錄所南初名某宋亡乃改名思肖即思趙憶翁與所南皆寓意也坐臥不北向扁其堂曰本穴世界以本之十置下文則大宋也精墨蘭自更祚後爲蘭不盡土根無所憑藉或問其故則云地爲人奪去汝猶不知耶

伯牙絕弦圖

終不求人更賞音只當仰面看山林一雙閑手無聊賴滿地斜陽是此心

秦女吹簫圖

錢唐厲鶚緝  
歙汪祖榮勘定

弄玉飄飄仙女姿。鳳皇低舞久相期。簫中應有別一曲。飛上青天影外吹。以上一百二十圖詩集。

逢陳宜之

行李苦役役。相逢古潤州。千金一夜醉。四海十年遊。山靜鬼行月。宵涼人夢秋。近聞邊事急。賦畝得無憂。

送友人歸

年高雪滿簪。喚渡浙江潯。花落一杯酒。月明千里心。鳳凰身宇宙。麋鹿性山林。別後空回首。冥冥煙樹深。

防隱者

石竇雲封隱者家。一溪流水繞門斜。滿山落葉無行路。樹上寒猿剝蘚花。

春日登城

城頭啼鳥隔花鳴。城外遊人傍水行。遙認孤帆何處去。柳塘烟重不分明。

春詞

春氣暄妍御夾紗。玉釵雙袅綠雲斜。倚欄看徧庭前樹。盡是枝頭結子花。

懷友

今日樽前忽憶君。爲憐秋事又平分。坐來凝睇西風久。過盡天邊數片雲。

春日遊承天寺

野梅香軟雨新晴。來此閑聽笑語聲。不管少年人老去。春風歲歲闔闔城。

湖上漫賦

蘇崖蒼潤雨初乾。石鱗飛泉噴雪寒。啼斷禽聲山更靜。青松影下倚闌干。以上咸淳集。

隱居謠

布衣暖。菜羹香。詩書滋味長。

醉鄉

江潮初上玉船空。假道青州一水通。相去塵寰千萬里。不愁日夜不春風。以上中興集。

自題推篷圖

清曉清風吹過後。露出青青一罅天。一似推篷偷看見。竹林半抹古蒼煙。

自題墨竹

萬頃琅玕壓碧雲。清風幽興渺無垠。當時首肯說不得。不意相知有此君。以上鐵網珊瑚。

龔開

開字聖子。號翠巖。淮陰人。

吳萊桑海遺錄序。聖子嘗與陸秀夫同居廣陵幕府。宋亡。潛居深隱。立則沮洳。坐無几席。一子名淩。每令俯伏。就其背。按紙作唐馬圖。風驟霧鬣。豪舒蘭筋。備盡諸態。一持出人。輒以數十金易之。藉是不飢。然竟以無所求而死。居吳之日。高郵龔璽璠爲忘年友。時人謂之楚兩。龔以比漢之兩龔。

高馬小兒圖



華驄料肥九分臄。童子身長五尺饒。青絲鞵短金勒緊。春風去去人馬驍。莫作尋常廝養看。沙陀義兒皆好漢。此兒此馬俱可憐。馬方三齒兒未冠。天真爛漫好容儀。楚楚衣裝無不宜。豈比五陵年少輩。胭脂坡下鬪輕肥。四海風塵雖已息。人才自少當愛惜。如此小兒如此馬。它日應須萬人敵。老大出無驢可騎。乃有此馬騎此兒。呼兒回頭爲小駐。停鞭聽我新吟詩。兒不回頭馬行疾。老夫對之空嘖嘖。

黑馬圖

八尺龍媒出墨池。崑崙月窟等閑馳。幽州俠客夜騎去。行過陰山鬼不知。

瘦馬圖

一從雲霧降天關。空盡先朝十二閑。今日有誰憐瘦骨。夕陽沙岸影如山。以上吳禮部詩話。

湯屋畫鑒云。此詩贈文人口。真有盛唐風致。

陸右丞君實輓詩

立事寧將敗事論。在邊難與在朝分。從來大地爲滄海。可得孤臣抱幼君。南北一家今又見。乾坤再造古曾聞。他年自有春秋筆。不比田橫祭墓文。

數闢天地人何與。分在君臣禮可無。周粟如山夷叔餒。史書猶日白嬰誣。舊邦新命方開化。公法私情本不渝。忠義未須論彼此。後先崇長是昌圖。可上陸右丞蹈海錄。

自題中山出遊圖

髻君家本住中山。駕言出遊安所適。謂爲小獵無鷹犬。以爲意行有家室。阿妹韶容見靚妝。五色臙脂最宜黑。道逢驛舍須少憩。古屋無人供酒食。赤幘烏衫固可烹。美人清血終難得。不如歸飲中山釀。一醉三年萬綠息。卻愁有物覩高明。八姨豪買他人宅。侍□君醒爲掃除。馬嵬金馱去無跡。

鐵網珊瑚翠巖自記。人言墨鬼爲戲筆。是大不然。此乃書家之草聖也。豈有不善真書而能作草者。在昔善畫墨鬼。有娘頤真趙千里。千里丁香鬼。誠爲奇特。所惜去人物料大遠。故人得以戲筆目之。頤真鬼雖甚工。然其用意猥近。甚者作髻君野溷一

豪猪卽之。妹子持杖披襟趕逐。此何爲者耶。僕今作中山出游圖。蓋欲一洒頤真之陋。庶不廢翰墨。清玩髻之書。猶真行之閒也。鍾馗事絕少。僕前後爲詩。未免重用。今卽他事成篇。聊出新意焉耳。

僕爲虛谷先生作玉豹馬先生有詩見謝極筆勢之馳騁乃以此詩報謝

南山有雄豹。隱霧成變化。奇姿驚人。毛物亦增價。天上房星滄瑞光。孕成白馬而黑章。爲誰容易來中國。風雪天山道路長。頭爲王欲得。方目爲相欲得。明脊爲將軍欲得。強腹爲城郭欲得。張絕憐此馬。皆具足。十五肋中包腎腸。嗟予老去有馬癖。豈但障泥知愛惜。千金市駿已無人。秃筆松煤聊自得。君侯昔如汗血駒。名場萬馬曾先驅。山林鐘鼎今何有。歲晚江湖託著書。白雲未信仙鄉遠。黃髮鬢鬢健有餘。飲酒百川猶一吸。吟詩何嫌萬夫敵。我持此馬將安歸。投之君侯如獻璧。君侯作詩凜馳騫。八荒滿盈動雷雨。定知此馬知此意。獨欠老奚通馬語。曹將軍杜工部。各有一心存萬古。其傳非畫亦非詩。要在我輩之襟期。君侯君侯知不知。鐵網珊瑚。

自題山水卷

谷口長松澗底藤。石橋山路晚登登。囊琴斗酒來何暮。空負寒齋昨夜燈。退谷消夏記。

題趙鷗波高士圖

雪氣侵人臥欲僵。苦勞明府到藜牀。主賓問答皆情話。何用閑名入薦章。式古堂書考。

張逢原

逢原字淵甫。鹽官人。橫浦先生之後。官漳州簽判。宋亡不仕。句曲外史伯雨其孫也。

題高房山夜山圖

地位清高眼界寬。盡收風景入毫端。廢宮臺榭和煙鎖。隔岸江山對月看。一水中分吳越近。層樓低接斗牛寒。有聲畫意吟難了。更把瑤琴膝上彈。鐵網珊瑚。

王 鎡

鎡字介翁。括蒼人。嘗官縣尉。當帝昺播遷。棄印綬。歸隱湖山。與尹綠坡虞君集葉柘山諸人結社賦詩。有月洞吟。

送默然上人歸天台

孤雲不定心。持鉢度寒林。野飯青蒲潔。客程黃葉深。海風潮水發。山雨曉煙沈。歸到石橋日。應看瀑布吟。

早行

客程因太早。卻費一更眠。落月已歸海。殘星猶在天。櫓聲荷葉浦。螢火豆花田。隔岸誰家起。青燈遠樹邊。

谿村

水路隨山轉，登晴踏軟沙。斜陽曬魚網，疎竹露人家。行鱗上枯岸，飢禽銜落花。老翁分石坐，閑話到桑麻。

古杭感事

國事彫零王氣衰，東南豪傑竟何之。雲埋廢殿排班石，草臥前朝記事碑。沙漲浙江龍去遠，天寬北闕鳳歸遲。可憐不老吳山月，曾照官家寵幸時。

尹綠坡山閒吟所

苔痕分路見人家，犬護籬根臥落花。一片林塘詩境界，四時花果隱生涯。鉏山揀日春栽藥，汲水和雲夜煮茶。耕錄有文須點看，旋搖松露入朱砂。

芳庭植上人

苔侵坐處石頭青，滿屋春雲不用扃。入定醒來香印冷，一簾花雨溼殘經。

段橋春望

拾翠車閑輦路塵，山南山北杜鵑春。誰家庭院東風裏，吹出桃花不見人。

裁衣曲

燒罷心香午夜闌，玉纖輕捻剪刀寒。衣成恐不如郎意，獨試燈前照影看。

春酌

酒闌歌罷翠簾遮，月柳驚啼子夜鴉。多少斷雲心上事，結成香夢是梨花。

燈花

喜信今宵報與誰。玉人曾翦畫雙眉。等閑開落銀釭見。只閉春風不得知。以上月洞吟。

萬壽

嘉字愚公仙居人。

中秋寄陳碧棲

秋氣清如此。秋花香奈何。人生還健在。月色況明多。有酒君當醉。無愁我欲歌。樓高俯松頂。誰共酌姮娥。

絕句

少日時時負百憂。從人絡馬與牽牛。中年置此身如竹。佳萬風前得自由。以上吳禮部詩話。

杜濬之

濬之字若川。金華人。旃之孫。領鄉貢。宋亡。矯行晦迹。寄食西峯僧寺以終。

述志詩

寧枉百里步。曲木不可息。寧忍三日飢。邪蒿不可食。雖云食息頃。便分淑與慝。志士當暮年。聞道轉歷歷。要使此一身。如琢復如滌。整冠與納履。微嫌費疏剔。未若瓜李地。絕不見吾迹。

書警

食李弗言苦。食梅弗嫌酸。不爲身所累。且從心所安。吾分固云薄。吾志亦非單。靜看如山禍。差之一念閒。所得甚眇眇。所喪已漫漫。百年修不足。一朝容易殘。雖處四壁立。如享萬鍾寬。靜坐明月窟。濯足清風灘。以上金華府志。

錢仲鼎

仲鼎字德鈞。通州人。宋末領鄉薦。

題趙鷗波高士圖

在昔洛陽雪深丈餘。士也高臥。來令尹車。今年吳淞雪復何如。積素一色。鷗鷺有無。之子江臯。修亭是居。有琴有書。有酒有魚。賞靜獨眺。聊以自娛。挹茲清風。凜凜起余。此景此圖。再卷再舒。

水村歌

舟搖搖兮風嫋嫋兮。波鱗鱗兮鷗翩翩兮。扣舷漁歌兮孰知其他兮。以上珊瑚網。

胡一桂

一桂字廷芳。婺源人。宋末鄉貢進士。學者稱雙湖先生。

冬至寓建陽作

繡日添漢宮。書雲紀晉觀。山家獨奚爲。剛腸占易象。幽人意欣然。起坐視晴漢。大化回初陽。茫茫今已旦。川泳有遊魚。雲飛見翔雁。滯留本何心。永懷發孤歎。誠哉利攸往。觀辭思過半。新安文獻志。

陳普

普字尙德。閩之寧德人。爲恂齋韓氏門人。韓出于慶元輔氏。蓋考亭的派也。宋亡後。三辟爲本省教授。不起。有石堂集。

秋日卽事

夜牀帳轉恨明遲。曉髮梳寒倚竹扉。樹影紙窗風作色。蛩聲壁罅月流輝。三杯白酒窮年客。滿篋紅塵隔歲衣。遙想閑鷗江上路。蓼花楓葉雨霏霏。

野步六言

黃犢眠中荒草鷺鷥立處枯荷。宦海風濤舟楫。故山烟雨松蘿。紅葉林風颯颯。蒼苔徑雨斑斑。人跡石邊流水。樵歌鳥外青山。

自哂

鬪雞走馬醉高陽。今日歸來兩鬢霜。無限少年心上事。半簾豆雨語寒蟬。

荀彧

亂離揀得一枝棲。得道爭知卻是迷。曹操若逢諸葛亮。暮年當作漢征西。

北地王諶

何物譙周口似簧。幾年漢帝手牽羊。紛紛蜀土祠諸葛。香火曾分北地王。

顏杲卿

驪宮歌笑入青雲。曾識常山有戰塵。忠骨已蕪餘髮在。因人得見夢中身。以上石堂集。

湘烟錄。此詩蓋指杲卿見

夢明皇妻疑髮動之事。

壽元、字仁仲，號北溪，安福人。

贈風鑑

空有奇胸貯石渠，功名不許老頭顱。憑君細閱寒窗下，還有他年房杜無。四朝詩。

韓性同

性同，字伯循，別號古遺，與陳石堂同里，而及其門，入元不仕。

岳王墓

妖星墮地芒角赤，龍劍悲號風蕭瑟。中原王氣挽不回，將軍一死爲毛擲。秦家小兒真戲劇，播弄造化搖樞極。指讎爲親忠且逆，隻手上遮天眼碧。九重茫茫隔天日，無由下燭臣愚直。臣愚萬死不足惜，國恥未湔猶憤激。古墳埋冤血空瀝，風雨年年土花蝕。我恐精忠埋不得，白日英魂土中泣。請將衰骨斲苔痕，獻作吾皇補天石。曹氏歷代詩選。

孫嵩

嵩，字元京，號艮山，休寧人，以薦入太學，有艮山集。

朱大同云：孫上舍，宋亡後，歸隱海寧山中，自號艮山，示不復仕。杜門賦詠，鍛苦鍊枯，凄斷淪絕，以寄其沒世無涯之悲。時髮源有制幹許月卿先生者，亦宋進士，宋亡歸隱，製齊衰服之以居，月卿增江凱及汪炎昶，皆絕意當世，俱從嵩遊，其詩悲壯激烈，讀之可知其爲人。



開歲連日陰雨

老杜詩章五百年。爲吾替寫早春篇。恰從元日踰人日。重有陰陰冷落天。日日嵐陰守翠微。清溪平沒釣魚磯。流鶯一任無來意。直恐梅花半樹稀。新草天涯入斷魂。若爲有意眺郊原。只應老子春愁少。須著瀟瀟雨暗村。

覓佳山水遷居未能又力役不休

微吟清嘯有孤懷。歷落嶽崎已大乖。芳草何心知世事。閑雲肆意繞天涯。前時絕喜王官谷。此去聊堪阿里街。一語作銘君記取。騰騰任運莫安排。

竹枝詞

灑灑堆頭君莫行。瞿塘峽裏不論程。龍吟小雨蜀天黑。等有明朝春水生。峽路陰陰無四時。寒雲鳥道挂天危。荒亭敗驛此何處。望帝江山聞子規。黃牛廟前鴉鶴棲。黃魔宮外梟鵬啼。估客醉神巫嫗醉。青林日轉風淒淒。

生日

雲外荒村半掩扉。門弧事業與心違。悠悠歲月山林老。納納乾坤道路非。鴻雁關河秋滿眼。梧桐風雨冷侵衣。蓼莪自是長休廢。獨立蒼茫一歎歎。

哭程晦夫

握手論交意氣真。舊遊四顧黯傷神。陪從金馬門中客。和唱銅駝陌上春。尚謂鄉邦雖有合。忍聞丘壟夜

無晨夕陽古道曾經別。腸斷西風淚滿巾。以上方回桐江集。

### 曲江頭

君不見曲江頭。離離衰草寒雲秋。今人不見昔年遊。昔人不見今日愁。欲談往事無耆舊。沈吟千載空搔首。盛衰倚伏如寒暄。秦時宜春苑。漢世樂遊園。更復唐人宮殿擁千門。往來古今但如此。同一溶溶曲江水。

### 秋懷

秋蟲日以喧。秋樹日以疏。君聽草根螿。泣弔風中梧。壯士秋懷涕。及此清霜初。從來感秋人。一例皆楚聲。吾聞古燕趙。慷慨多不平。惜哉宋玉辭。不使荆軻聽。何處秋聲多。竹外聲歷歷。淒切不禁寒。蕭蕭舊時碧。此中白髮愁。餉與秋風客。疇昔旅江湖。夜夜南飛雁。山園柿栗秋。出戶望河漢。祇令寒雁時。中夕起三歎。黃山秋雕鏤。風露洗崖竄。行行聽清猿。處處采靈藥。秋雲老石牀。已後十年約。

### 冬夜雜興

牧童與樵叟。共載牛背歸。我無薪蒸計。南山松櫟稀。寒風昨日至。須用葺我扉。破扉故可葺。何以完我衣。人生有定分。勿怪生理微。

### 行都餞歲

插架餘殘歷。桃燈憶故鄉。年光蛇赴壑。羈跡雁隨陽。禁闕迎雛鼓。鄰街祭竈香。英雄須自力。容易鬢毛蒼。

臨安錢武肅廟

吳越歸旗纛，風雲初鼓聲。錦蒙山樹徧，弩射海潮低。龍鳳城蔥鬱，牛羊墓慘悽。古祠存故里，秋草廡東西。

春日武康遊望過孟東野故居

殘靄初收半在沙，一川芳草趁溪斜。羣峯古意汪芒國，廢地詩情正曜家。天末淒迷浮野色，柳邊駘蕩受春華。更攜尊酒看脩竹，不爲前陂得意花。

紫陽夜坐

一夜燈前白紵單，沈吟有此夏初寒。露零若與人相語，松杪蕭蕭下石壇。

姑蘇元夕

茂苑長洲滿地春，吳兒歌舞逐時新。風流百巧花燈手，猶是夫差國裏人。以上新安文獻志。

孫巖

巖字次臯，號爽山，嵩之弟，有爽山集。

方虛谷序云：長孫君蓋元京詩，清勁苦淡，如其爲人。小孫君巖次臯，予未之識，忽袖詩訪于武林，亦清勁苦淡如其兄。

去冬過石潭，上時吳義夫同行，欣然謂予曰：詩境甚佳，今日再過，有作將寄義夫。

長潭有令姿，山綠納空洞。軒軒吳武陵，曾此接飛鞚。殷勤顧我笑，詩材不勝用。重來春事深，物采尤錯綜。緒小強懷大，秀異冝受控。沈吟日已長，十鼓纔一中。故人抱才藻，衆象入嘲弄。即今溫水館，匡坐教弦誦。

嗟哉實前語。束葦代宋棟。明當寄東風。烟水發清夢。

留武林

訪客城南隅。故第何其雄。曲池猶瀼瀼。土山尙竈窰。頗聞此中人。易姓良怱怱。往時恩澤侯。意氣干晴虹。樂曲播秦城。衣制聞漢宮。恨不逢季倫。詎肯交毛公。斥地西鄰去。伐木南山空。百楹一傳舍。顧極當年工。悠悠感成敗。何獨操鋤翁。

觀漁行

霜降平湖鑑羣象。中有黃魚幾一丈。漁師早已中豪家。今日連舟布新網。東西南北三重圍。圍形漸縮如小池。孟獲身窮呂布窘。尙許性命延斯須。舊與鱗魴同出入。爾暇悲憐禍相及。日斜創甚上平沙。兩岸居人如堵立。渺渺腥風吹水雲。賣魚沽酒賽湖神。醉來預唱江南春。

和元京兄賦蘋花

一春觀物眼。紅紫厭繽紛。此水浮明玉。何人翦白雲。惠風遊漢女。吉日禮湘君。地僻應無是。留花混藻芹。兵後續溪道中

古道緣流水。寒郊帶斷烟。稀疎鴉種麥。羞澀女耕田。人事休兵後。秋懷落木前。小蘇遺翰墨。今古一山川。

方虛谷云。休兵落木之

句。非近人晚進所能到。

陳監丞用韻見贈亦和以謝

肅肅東方老，依人可計年。名言傾蓋後，古意結繩前。君戶仍多轍，予琴故一弦。不應昌歎味，置在衆肴先。

九日呈戴兄

一別三十載，而今近講堂。蕭條同甲子，強健又重陽。萸菊數杯酒，烟雲千仞岡。偶然爲此夢，寧復次狂公。

方虛谷云。

類陳后山。

出越城舟行紆道以避過兵

擾擾紅巾起草閒，舊遊何地不搶殘。歸囊薄有桃花米，行路如經竹節灘。戰馬冬來橫殺氣，扁舟北去解憂端。曲肱便結須臾夢，柳暗黟川把釣竿。

武林絕句

繽紛迎酒伎，宛轉賣花聲。偶似承平世，攜書試鳳城。  
比屋單衣日，名城冷食天。居人多上冢，遠客未歸田。

樹陰

春去空山啼乳鷺，鷺邊老樹幕新青。一瓢挂此坐終日，卽是蘇家擇勝亭。以上新安文獻志。

膝、槩

槩字仲塞，號星崖，婺源人。

汪幼鳳云：星崖常命其兄子舜父，求文丞相遺墨，舜父得所書過金陵驛詩，以歸，日懸於堂，焚香拜泣。又過西湖，拜岳將軍墓，有相對含悲石翁仲，老衰無淚落秋風之句，其忠義蓋天性也。

東城

東城有高樓，峨峨冠城闕。我來屬昏暮，見此初上月。遙天羅江山，極目如霽雪。江山秀如此，豈不生豪傑。臨風一高歌，達曙何由歇。新安文獻志

張炎

炎字叔夏，號玉田，又號樂笑翁，循王諸孫，本西秦人，家臨安，生于淳祐間，宋亡，落魄縱游，工爲長短句。

鄧牧心云：玉田春水一詞，絕

唱今古人以張春水目之。

舒閏風云：叔夏詩有

姜夔章深婉之風。

腰帶水 在奉化州西五十里。

犀繞魚懸事已非，水光猶自溼雲衣。山中幾日渾無雨，一夜溪痕又減圍。延祐四明志。

潘文虎

文虎字武子，金沙人。

寓言詞 爲被虜婦作。

交交桑扈，交交桑扈，桑滿牆陰。三月暮，去年蠶時處深閨，今年蠶時涉遠路。路傍忽聞人采桑，恨不相與

攜傾筐。一身不蠶甘凍死。祇憶兒女無衣裳。山房隨筆

陳森

森字茂卿。婺州人。生宋末。卒。以詩殉葬。

南海南

連弩聲。擗黑風壯。白日滄波影相盪。神蛟一去還不還。淚溼空荒捲烟浪。盤渦蜃氣高。蠱天老鯨巨。鼉那  
忍眠。老鯨已化子獨返。越山越水青茫然。樓船夜半猩猩語。黃葛花開墜秋雨。金華詩粹

陳深

深字子微。平江人。宋亡。棄舉子業。閉門著書。有寧極齋橐。

曹叔時見過索餞篇

泄雲蒙朝日。微雨霑庭除。幽人掩關臥。門外無來車。曹子別經歲。枉道過我廬。謂余抱文藝。胡爲守鄉閭。  
余曰。匪高尚。褊性涉世疎。上奉白髮親。餘暇讀我書。豈如叔時甫。妙年美名譽。詞華爛絲繡。問學滋新畬。  
奉子一卮酒。聊爲談斯須。威鳳翔高閣。逸驥騰雲衢。及時樹遠業。臨事毋躊躇。

內人臂白鸚鵡圖

華清宮中歌既醉。南海奇禽遠爭致。玉環最愛雪衣娘。當時曾得龍顏媚。璿房雕檻春日長。繡綳嬌兒在  
傍戲。君王憐汝解語言。懷恩不說宮中祕。臨風鷺鳥何軒軒。歎惜純良遭猛厲。茗翁寫出當時事。側立紅  
衫內人臂。江花滿地不忍看。空拂畫圖憐俊慧。

南遊

驅車登遠道，白日忽西流。宇宙驚新夢，山河感舊遊。雲迷江令宅，月澹庾公樓。已已知何奈，長歌去國愁。

悼亡

短日一何急，殘宵不甯明。霜寒那有夢，月落重傷情。壁凍琴絲斷，風驚燭淚盈。微言憶王衍，達理誤莊生。

南湖史君製暗香湯奇甚賦絕句求之

霧閣雲窗深閉春，微聞玉杵擣清聲。元霜祇許雲英見，地上詩人渴夢生。自注：時侍姬新至，故戲及之。以上寧

極齋集

劉鑑

鑑，字清叟，號立雪，江西人。少年才氣卓犖，連蹇不第，中更世故，蹙額悲吟，鰥居隱處，年踰七十而

終，有立雪豪。

同門生鄧光薦序其第五乘云：余嘗評君一生，琢對匠語，洗削治擇，齒牙閒繡，纏有聲。大率成就精切二字而已。今皮毛落盡，孤立兀然，雷霹之琴，火成之鏗，潮湍激瀉之山，皆自然成趣，有不假繩削而合。蓋子是門外雪三尺矣，得其髓者，非齊腰子不能。

題醉月亭

采石江頭李太白，狂不奈煩宮錦窄。赤壁磯下蘇東坡，一葉泛泛凌風波。當時有月并有酒，和酒和月吞入口。酒腸得月冷于冰，化作瑰辭喧宇宙。兩首賦，百篇詩，千秋萬古稱絕奇。兩翁不作歸來鶴，孤宇瓊樓



寒漠漠。若得長江變潑醅。少住人閒亦差樂。望圓晦缺秋復春。古來明月今來人。我時舉酒問明月。月亦團團磨不得。鐵如意。玉唾壺。我歌君和聲。嗚嗚爛醉起舞噴人扶。問影莫是李與蘇。月中仙子知得無。

寄朱約山

歲晚江空烟水寒。楓林葉落楚天寬。苦無雁足書難寄。作盡鶯聲吟未安。晉帖臨成思入石。離騷讀罷擬栽蘭。老來絕被梅花惱。後會君應笑我孱。

謁蕭小山

一冬清暖春相似。欲扣吟關未有詩。折得梅花裝擔了。起程還是雪飛時。  
一水凝寒棹不開。幾人于此欲船回。思君卻有扁舟興。半夜直衝風雪來。以上立雪齋

葛慶龍

慶龍九江人寓越。

霏雪綠。葛慶龍號秋巖。又號寄漁翁。江南野道人。蚤年嘗入匡廬學浮屠法。稱壽書記不樂。遂歸俗。放浪江湖中。名公鉅卿。酒徒劍客。多與之遊。好爲詩。落落有氣。每風日清美。乘筇輿遊天衣雲門諸山。年逾七袞。鬚齒童顏。終歲不澡沐。肌體清潔。衣垢不生。蚤蠶化去。王君理得。函其骨于仙人洞。仍鐫石爲冢。  
像并一鶴于洞中。在山陰縣西北六十里。至今稱葛仙洞。

贈僧

七軸蓮經供茗瓢。一龕繡佛挂松寮。舶香亦帶魚龍氣。自采枝頭柏子燒。

謝理得惠書

五朵飛來漬刻藤，重重響似水泠泠。不教落在紅塵耳，讀與青松白鶴聽。

詠黃石公

挾書律重火猶光，天下嚴搜不敢藏。圯上老人無見者，一編親寫授張良。

筇杖

白髮慵巾短短衣，閑行斜倚小筇枝。自家弄影猶癡絕，只似初騎竹馬時。

題仙人洞并謝草堂方公所贈石匣

多謝林僧亦好奇，新遺石匣我酬詩。鶴胎收卻雲封裏，付囑山靈木客時。

雲長鎮洞有時開，石匣終藏化鶴胎。千藏不須華表柱，飛鳴南向洞山來。以上霏雪錄。

遊寶林寺

坐如有待思依依，看竹迴廊出寺遲。窅窅綠陰清寂處，半窗斜日兩僧棋。越詠。

于石

石字介翁，婺之蘭谿人。業詞賦，自負甚高。宋亡，隱居不出，一意于詩。因居鄉，自號紫巖。晚徙城中。

更號兩谿有集

探梅分韻得香字

絕壁兩屨雲，荒村半橋霜。孤往欲何之，林下幽徑長。寒梅在何許，臨風幾徜徉。誰家斷籬外，一枝寄林塘。

水靜不搖影。竹深難護香。無言獨倚樹。山空月荒涼。

路傍女

路傍誰家女。躊躇不能去。自言妾小時。家本樵川住。十五嫁良人。長年秉機杼。辛勤奉舅姑。足不越庭戶。去年秋棗紅。邊人健如虎。移家入深林。自謂百無慮。空山鳴劍戟。失色駭相顧。星散各偷生。不幸適相遇。妾身如風花。飄零委塵土。妾命如蜉蝣。焉能保朝暮。一死恨不早。空爲年少誤。去去忽相失。零落在中路。妾有乳下兒。啞啞方學語。四海尚干戈。安知爾生死。回首望天涯。家山在何處。妾命負所天。顧影惟自憐。自憐輕失節。天下何獨妾。

我從山中遊

我從山中遊。歸來林壑暝。澗水凍不流。月出四山靜。柴扉不敢敲。恐驚孤鶴醒。徘徊踏月明。倚杖看松影。得家書

半山亭

久客秋又晚。思家夢屢驚。空階聞葉落。隔樹見鐘明。親老貧常健。兒癡學未成。淒涼今夜月。將我故鄉情。萬壘風光冷。滴水清。泉白石鎖烟扉。半山落日樵相語。一徑寒松僧獨歸。葉墮誤驚幽鳥去。林空不礙斷雲飛。層崖峭壁疑無路。忽有鐘聲出翠微。

春事

白了江梅柳又青。遊絲千尺網紅塵。鶉鳩夫婦孤村雨。杜宇君臣故國春。客裏易添芳草思。樽前誰是去

年人。桃花源上空流水，安得漁郎一問津。

旅中遣懷

片雲相望浙東西，回首家山路欲迷。昨夜桐江江上夢，倒隨流水上雙谿。以上紫巖集。

方 夔

夔一名一夔，字時佐，淳安人。生于宋季，嘗從何潛齋遊，攻舉子業，不利于有司，退隱富山之麓，扁其堂曰綠猗，授徒講學，其間自號知非子。學者稱富山先生，有富山蠅豪。

錢王守臬墩在臨安道左

山下鐙龕挂紙錢，水楊墩上草芊綿。高人不要金丸用，買得三吳八十年。

盧明之開鑪

懶作西風汗漫遊，歸謀諸婦此淹留。采花墩近初成酒，種秫田多早帶秋。燕領已空西塞夢，犢禪莫遣遠山愁。滄江留得偏醒客，袖手時凭百尺樓。

九里路

去年九里路，烏攫人腸挂枯樹。今年九里溪，沙頭白骨高復低。人生變滅如泥土，久後猶傳姜萬戶。翠眉紅頰誰家兒，夜赴軍前效首虜。將軍多愛恩意疎，分將吳口充苞苴。殷勤道與送行使，前日朝官多有書。自注：唐人攻藩，中朝官多以書託主將求沒官妻妾。

續感興

猛虎等百獸。天賦與長雄。曼胡秋利戟。隅目磨青銅。從知世路暗。羣行各西東。吼地一長嘯。颯颯來悲風。飢來待人肉。不數豹與熊。肥頰而黑喙。不知是何蟲。坐臥不自防。穴爾皮毛中。爾虎雖云猛。一旦皮骨空。慎勿欺微細。卽且制神龍。

惡木生高岡。枝疎上指天。雨露非有私。蟠踞幾何年。堯子寢其下。山鳥棲其巔。匠石過不睨。生理得自全。皮爲野火燒。根爲螻蟻穿。空中不足恃。一朝踏而顛。上有千歲藤。相依久纏綿。樹猶不足保。爾藤何足憐。二女灑竹淚。盡是心中血。精誠著于物。千載猶不滅。當時從南巡。豈少稷與契。奈何比孤纍。匍匐陽城謁。皇英獨何人。風泉共幽咽。可憐女子心。慷慨男兒烈。湘水流不斷。誰道恩情絕。何時見歸來。續君遠離別。驚禽營顆粒。飛飛集丘隅。遊人困行役。十年落江湖。煌煌秦與洛。運轉天下樞。啓明曜東漢。萬足爭奔趨。豈無爪距力。遠利如孫吳。得失昧前料。青雲閒泥塗。天命有厚薄。定分不可渝。歸來北山下。俯仰收桑榆。

秋晚雜興

青溪溪上路。書劍此棲遲。涼月穿衣褐。寒波照鬢絲。古桐傳賀若。橫玉犯龜茲。不爲傷秋老。孤吟自可悲。  
以上富山雜興

金應桂

應桂字一之。號蓀壁。錢唐人。又號積慶山人。

賦輔之佩楚軒客談。一之雅標度。能歐書。受知賈似道。晚居西湖南山中。築蓀壁山房。左弦右壺。中設圖史古奇器。客至。撫摩諦玩。清談纒纒。不得休。每肩輿入城。府幅巾。整衣冠之。若神仙然。

送西秦張仲實遊大滌洞天

山林有真趣，得趣即神仙。好趁暮春月，來遊大滌天。晴嵐融玉室，花氣襲丹泉。此地通懸壺，清吟過叔元。  
洞霄詩集

潘 喆

宋末人。

經賈秋壑故第

相業如何不到頭，諸公歷歷頌伊周。夢迷葛嶺酬歌夜，鬼哭樊城血戰秋。誤國正須憂大廈，覆師寧忍駕孤舟。木棉庵裏催歸魄，誰掩湖山富貴羞。  
杭州府志

汪楚狂

感慈元殿

翠華扶輦出龍庭，蜜炬星繁天未明。鷓鴣分行江上別，貔貅從駕雨中行。綠波淼淼浮三殿，紫禁沈沈斷六更。惟有周遭山似洛，不堪回首涕縱橫。  
忠義集

王沂孫

沂孫字聖與，號碧山，又號中仙，會稽人，與周公謹、唐玉潛諸公倡和，有詞名。花外集。

觀周曾秋塘圖有作一字至七字款題琅琊聖與。

秋、秋、蕭灑、清幽、人靜處、水邊頭、波紋細細、風色颼颼、鷗鷺情相狎、鳧鷖樂自由、疎葦敗荷池沼、白蘋紅蓼。

汀洲。幾竿漁釣去已盡。一段晚雲寒不收。珊瑚網。

周密

密字公謹。號草窗。濟南人。流寓吳興。居弁山。自號弁陽嘯翁。又號蕭齋。淳祐中。爲義烏令。有蠟屐集。齊東野語。癸辛雜識。志雅堂雜鈔。浩然齋視聽鈔。武林舊事。澄懷錄。雲烟過眼錄。

鄧牧心序云。蠟屐非屨非寫。不足以忘足。而阮孚愛之。詩發乎情性。與蠟屐不類。周公謹以名其集。豈以阮孚所以忘足者。而忘心于詩物無美惡。溺于所愛。皆不得爲性情之正。安得與詩同日語。然與爲阮孚猶愈于祖約畏人。況不爲阮孚者乎。

南郊紀事

黃道宮羅瑞腦香。袞龍升降佩鏘鏘。大安輦奏乾安曲。萬點明星簇紫皇。  
萬騎雲從簇錦圍。內官排立馬如飛。九重闔闔開清曉。太母登樓望駕歸。

西太乙宮 在孤山路。舊四聖觀。理宗朝建。

藥宮廣殿號黃庭。突兀浮雲最上層。五福貴神留不住。水堂空照九枝燈。

南園 光宗朝。賜平原郡王韓侂胄。陸放翁爲記。

清芬堂下千株桂。猶是韓家舊賜園。白髮老翁和淚說。百年中見兩平原。

甘園 內侍甘昇園。又名湖曲。曾經臨幸。有御愛松。望湖亭。小蓬萊。西湖一曲。

小小蓬萊在水中。乾淳舊賞有遺蹤。園林幾換東風主。留得庭前御愛松。

寶觀崇壽寺 在鳳皇山。劉黃妃功德三門。有陳公儲畫龍。

翟羽鸞銷事已空。奉華遺寺對高松。宮斜鳳去無人見。且看門前粉壁龍。奉華劉妃閣名。以上武林舊事。

韓氏慶樂園

舊事淒涼尙可尋。斷碎閑臥草深深。凌風閣下槎牙樹。當日人疑是水沈。

齊東野語云。四朝園見錄。載蜀帥獻韓平原沈香山。高五丈。立之南園。凌風閣。下今慶樂園。卽南園也。所謂香山。尙巍然立于閣前。乃枯槁耳。初非沈香也。

爲楊大芳悼亡

帳中蜨化眞成夢。鏡裏鸞孤枉斷腸。吹徹玉簫人不見。世閒難覓返魂香。

癸辛雜識。大芳娶謝氏。謝亡未殮。有蜨大如扇。其色紫褐。翩翩自帳中徘徊。飛集窗戶。開終日乃去。

乙丑良月游大滌洞天書於蓬山堂

太虛灑氣浮空濛。烟霞九鎖蓬萊宮。崩騰雲木競奇秀。澗芳野實垂青紅。何年斷鼇立天柱。古洞陰森白鴉舞。玉書寶劍不可尋。老翠封崖滴元乳。光芒靈氣干斗牛。遺丹箬底誰能求。黃精紫杞徧巖谷。仙禽夜擣聲幽幽。懶蛟千年睡未足。癡涎吼雷噴飛瀑。陰風黑穴吹海腥。石虎當關橫地軸。是非萬古一笑慨。神仙不死今安在。

送西秦張仲實游大滌洞天

玉室金堂積翠邊。舊游猶記劫灰前。禽聲夜擣千年藥。花片春浮九鎖泉。洞府暗通滄海路。樓居何異化



成仙。茶香筍美松醪熟。正好山中過禁煙。以上洞霄詩集。

題高房山夜山圖爲江浙行省照磨李公略作

郎潛暇日多冥搜。夜深獨上千尺樓。天回海立月政溼。風足雲涌山疑浮。縈青繚白互變滅。浮嵐飛霧寒颼颼。潛蚪棲鶴聲磔磔。山鬼木客鳴呦呦。城中癡兒方嚙語。有夢不到千山幽。遙岑寸碧目力遠。欲迴汗漫凌風游。高侯落筆萬象泣。寫出千古蒼茫愁。無聲詩與有聲畫。一夕異事傳南州。玉琴在膝酒在手。欲寫天籟無莊周。憑誰爲問華表鶴。城郭人民今是不。鐵網珊瑚。

題溫日觀葡萄

百八牟尼顆。攜將萬里游。歸來還自笑。何不博涼州。六硯齋筆記。

題高彥敬山村圖卷爲仇仁近作

我昔遊七閩。百嶺爭巖峩。白雲漲川原。深谷如積雪。又游天姥岑。幽磴緣曲折。長林翳寒日。十里行落葉。轉頭五十年。遐想正愁絕。開圖意忽動。懽悅生內熱。何當駕松广。分我翠一疊。弁陽我所廬。見謂山水窟。漂零媿楸枿。歲月老薇蕨。平生阮遙集。足痺屐齒折。何當賦歸田。初志遂所愜。懷哉復懷哉。清夢繞林樾。清河書畫舫。

句

繁華不結三春夢。零落空餘寸草心。杭社試燈花。佩楚軒客談。

呂同老

同老濟南人，有詞見樂府補題宋遺民也。

丹泉

鬻沸檻外泉，遠出天柱陽。清音應空谷，潛波渙寒塘。昔人養靈芝，長年此山旁。金骨換玉髓，素蚪朝紫皇。尚餘浴丹池，神光透扶桑。蓬萊幾揚塵，茲泉日泱泱。我願滌世氛，朗詠三元章。手持北斗杓，下酌流霞漿。

洞霄詩集

題高房山夜山圖

我昔絕江看吳山，朝光正落山水間。金波遠自海門人，翠嵐高插扶桑殷。安知瑤樓有夜景，明月蒼茫墮清影。李侯勝賞高侯筆，展卷一時如夢醒。鐵網珊瑚

龍泉寺納涼

靡靡市廛盡，杳杳泉石閑。灌木蔽榛莽，爽籟彌空山。飛臺納餘輝，丹牖粲以繁。巍然青蓮宮，俯此碧玉闌。化人淡無爲，趺坐觀塵寰。支郎杳不逢，元蟬噪其閒。昔賢憩游地，咎井潛龍蟠。詠歌之所傳，百世猶不刊。我生悅超曠，危磴重躋攀。歸隱諒未能，溯風發長歎。越詠

鄭斗煥

斗煥字丙文，號松窗，弁陽老人周密編輯絕妙好詞，特載其人于宋末。

陪秋山相公遊大滌洞天一庵夜宿感夢

天柱清游尾使星，筳輿軋軋入山深。龍行雨去泉花定，鶴叫雲來木葉陰。松石已安通夕寢，江湖空老百

宋詩紀事 卷八十

年心圓冠方袂何仙子夢裏將詩索共吟  
洞霄詩集

宋詩紀事卷八十一

錢唐 厲鵠 緝

歙 汪還仁 勘定

鄧 牧

牧字牧心，錢唐人。與謝翱友善。歲丙申，至山陰，王脩竹延致陶山書院。己亥，入洞霄，止于超然館。住山沈介石，爲營白鹿山房，居之。與葉林爲深交。林坐蛻踰月，牧亦無疾而化。所著有洞霄圖志、游山志、雜文、彙名、伯牙琴，衆稱曰文行先生。

九鎖山十詠 存三首

棲真洞

何年采真遊，遺此棲遁跡。流泉金石奏，伏鼠霜雪色。浮世幾興亡，殘基耿苔石。

龍洞

老龍山中居，出山作霖雨。風雲幾聚散，田野正辛苦。神仙地位高，使爾司下土。

仙人隱跡

至人猶神龍，變化不可測。隆然七尺軀，印此一片石。我行半江海，空飛杳無跡。洞霄詩集

寄友

我在越君在吳。馳書邀我遊西湖。我還吳君適越。遙隔三江共明月。明月可望。佳人參差。笑言何時。寫我相思。知君去掃嚴陵墓。祇把清尊酌黃土。浮雲茫茫江水深。感慨空勞弔今古。孤山山下約陳實。聯騎須來踏春色。西湖千樹花正繁。莫待春風吹雪積。有酒如澠。有肉如陵。鼓趙瑟。彈秦箏。與君沈醉不用醒。人生行樂耳。何必千秋萬歲名。吳禮部詩話。

湯仲友

仲友初名益。以字行。更字端夫。吳郡人。學詩于周弼。晚號西樓。有壯遊詩集。

弔葛嶺賈秋壑故居

檀板歌殘陌上花。過牆荆棘刺檐牙。指揮已失鐵如意。賜子寧存玉辟邪。敗屋春歸無主燕。廢池雨產在官蛙。木棉菴外尤愁絕。月黑夜深聞鬼車。山房隨筆。

盧熊蘇州府志云。湯仲友過

賈相宅一篇。最爲人所稱。

留題惠山寺

梁溪停短棹。帶月步西關。路盡忽逢寺。松多不見山。巖腰雲殿古。洞口石泉閑。到此政吟苦。秋聲滿樹閒。  
惠山集

西湖

山色波光步步隨。古今難畫亦難詩。水浮亭館花閒出。船載笙歌柳外移。過眼年華如去鳥。惱人春色似

遊絲六橋幾見輪蹄換。取樂莫辭金屈卮。西湖遊覽志。

### 虎丘

虎是何年踞。名存跡已亡。塔從林外出。山向寺中藏。池暗生寒氣。臺荒受夕陽。更無人道古。來祇爲春忙。  
虎丘志。

### 游洞庭

寒色滿空山。翛然一徑閑。鳥啼黃葉外。人度翠峯間。古殿藏雲氣。唐碑帶蘚斑。未窮幽絕處。興盡忽思還。  
震澤編。

### 趙棠

棠字國炎。

### 弔瓊花

名擅無雙氣色雄。忍將一死報東風。他年我若修花史。合傳瓊妃烈女中。

山房隨筆。楊州瓊花。天下祇一本。士大夫愛重。作亭花側。扁曰無雙。德祐乙亥。北師至。花遂不榮。趙棠國炎賦絕句弔之。

### 李坦之

坦之字道坦。錢唐人。生宋季。早歲入洞霄宮。學文于高士鄧牧。心爲所稱許。

### 杜鵑行

宋詩紀事 卷八十一

吾聞昔有蜀天子。化作冤禽名杜宇。一身流落懷故鄉。萬里逢人訴離苦。西來縱呼巫峽閒。楚臺花落青春闌。臺中魂夢久寂寞。行雲日暮愁空山。明朝復向瀟湘發。北叫蒼梧江竹裂。竹間之淚花上血。怨入東風俱不滅。天涯無窮朝暮啼。王孫草綠不思歸。哀哉王孫終不歸。江南江北楊花飛。

寄吳正傳

拂袖行歌歸故鄉。相思又是一星霜。夢回江上秋楓杳。愁入天涯春草長。書問久淹嗟契闊。詩章時讀慰淒涼。知君亦有逍遙興。肯學征鴻爲稻粱。

送人歸嚴陵并寄吳正傳

官車一兩馬並馳。送君朝出城門西。投觴誓河以爲別。東流到海無還期。雲閒挂冠歸故里。河上停帆謝遊子。不願松江食巨鱸。甘向桐川釣寒水。子陵昔釣川之側。百尺高臺猶屹立。斜日歸舟繫石根。稽首清風無媿色。金華洞天深且幽。神仙牧羊松下遊。故人吳君仙者儔。高臥巖屋秋浮浮。茲山相鄰邇睦州。山翠俯壓城南樓。吳君之家某水丘。尺書欲煩親手投。一見足寫平生憂。

白鷗子歌

淮西猛士高將軍。新獲驍禽被涼素。調之弗顧情未狎。跨馬臂出城東去。征鴻作字雲邊斜。簪身直上誰能遮。天寒日暮望不見。北風萬里吹瑤花。雲飛忽斷鴻飛卻。短草長煙際沙漠。但餘孤色搖清秋。未許纖毫生碧落。歸來珍衛不解鞵。親手餒肉供飢喉。英雄遇合固有分。可惜驚塵俱雪頭。

李白酒樓歌

綠楊酒樓春水涯。白也繫馬樓東家。千金醉盡不復顧。猶吹玉笛引吳娃。日斜樓外東風起。春愁滿眼楊花裏。高歌一曲下樓去。傳徧江南數千里。錦袍綠水迷蹤跡。月落空梁照顏色。江頭盡日不見人。樓上幾年無此客。倚闌仰看西飛雲。胡爲不飲愁其身。卽今寂寞千年後。誰醉青青山下墳。

句

落日中原小。悲風易水寒。凡物皆歸土。深山始見天。落葉城南草。綠王孫去。江上花飛燕子來。清江百曲秋花底。漁火孤村暮雨中。芙蓉水碧雙鳧冷。苜蓿秋高萬馬肥。以上吳禮部詩話。

呂徽之

徽之字起猷。號六松。台之仙居人。遯跡不出。操行極高。

詠雪用滕字韻

天上九龍施法水。人間二鼠齧枯藤。鶩鵝聲亂功收蔡。蝴蝶飛來妙過滕。

復請曇字韻又賦

萬里關河凍欲含。渾如天地尙函三。橋邊驢子詩何惡。帳底羔兒酒正酣。竹委長身寒郭索。松埋短髮老瞿曇。不如乘此擒元濟。一洗江南草木慙。

輟耕錄。徽之長于詩。宋亡。隱居萬竹山中。樵漁自給。一日大雪。攜楮幣易粟富家。聞其分韻賦詩。有得滕字者。苦吟不就。徽之笑曰。何不舉滕王蛺蝶事。衆迎入。請成之。援筆而就。又請賦曇字韻。隨筆書訖。徑出問姓。字不答。與之粟。曰。吾豈愛不義者。必



欲易之刺船而去。遣人尾其後。路甚迂僻。雪霽往訪。唯草屋一間。忽米桶有人。乃徽之妻也。因天寒。故坐其中。詢所之。曰。捕魚溪上。詣之。呂方樓舟。隔岸遙揖。曰。諸公曷先如舍。遲我乎。少選。徽之攜魚換酒歸。盡懽別。它日復往。已逸。莫知其處。

冬日

斗室蕭蕭日晏眠。疎狂唯與嬾相便。尋常甲子無心記。看到梅花又一年。台州府志。

劉彥章

彥章。吉水人。宋亡後。與劉桂隱。劉申齋講學。有詩名。

題廬陵義士傳

淮海風迴吹血腥。青原不改舊時青。中朝將帥論功賞。不及江南一白丁。

題新淦劉貞女傳

百年節義仗英豪。一死翻憐女子高。不敢高歌題卷上。轉喉恐觸舊官曹。以上吉安府志。

胡貫齋

貫齋。廬陵人。

挽文山

裂指秋風感別離。乾坤人物太奇奇。生爲孝子忠臣勸。死結皇天后土知。萬折江流魚腹石。千年人立首陽碑。一門史氏春秋筆。愁絕湖光入畫時。庶齋老學叢談。

洪平齋

挽疊山

千古精忠日月光，恨無麟筆寫堂堂。還家恥作梁江總，辟穀誰知張子房。後死十年應有待，輕生萬里故非狂。有兒可拾江邊骨，須信人亡道不亡。疊山集附

趙澗邊

挽疊山

西山東海莫容身，芒屨蕭蕭萬里塵。去住更無寬歲月，死生惟有一君親。丹心故國紅雲冷，白骨他鄉寒草春。不是回頭春已暮，至今猶說似癡人。疊山集附

翁森

森字秀卿，號一瓢，台州仙居人。宋亡，隱居教授，有一瓢集。

四時讀書樂

山光照檻水遶廊，舞雩歸詠春風香。好鳥枝頭亦朋友，落花水面皆文章。蹉跎莫遣韶光老，人生唯有讀書好。讀書之樂樂何如，綠滿窗前草不除。

新竹壓簷桑四圍，小齋幽敞明朱曦。晝長吟罷蟬鳴樹，夜深燼落螢入幃。北窗高臥羲皇侶，只因素稔讀書趣。讀書之樂樂無窮，瑤琴一曲來薰風。

昨夜庭前葉有聲，籬豆花開蟋蟀鳴。不覺商意滿林薄，蕭然萬籟涵虛清。近牀賴有短檠在，及此讀書功更倍。讀書之樂樂陶陶，起弄明月霜天高。

木落水盡千崖枯，炯然吾亦見真吾。坐對韋編燈動壁，高歌夜半霜壓廬。地爐茶鼎烹活火，一清足稱讀書者。讀書之樂何處尋，數點梅花天地心。仙居縣志

陸正

正字行正，號率齋居士，嘉興之武原鄉人。精于律呂象數之學。元世祖遣程文海至江南訪求賢士，稱疾不出。後復與劉因同徵，不赴。隱居教授以終。門人私謚曰靖獻先生。

古意

結襪事君子，誓作形與影。人事多乖離，彼此睽燕郢。尺書沈素鱗，啼鶻催逝景。妾命詎終薄，君心那得冷。開簾花撲面，淚落紛如綆。柘上遺詩

潘音

音字聲甫，天台人。宋季躬耕不仕，築室南洲山中。詔徵天下遺逸，廉訪使檄贊之行，固辭，有待清軒遺藁。

有所思

中心有所思，蹙損雙蛾眉。美人竟長往，使我歎離居。寂寞就孤枕，強眠誰得知。夜深清露重，飛夢欲何之。覺來日遲遲，分照上羅幃。妝臺理雲鬢，種種盡成絲。

山中寄友人

我來臥白雲，潭影清華髮。經歲無稻梁，侵晨采薇蕨。峯頭天籟鳴，隴上樵歌發。還擬醉濁醪，與君弄山月。

悼楊侍郎

屈指漢遺老，如君復幾何。鳳池冠劍近，鈴閣典章多。國已成禾黍，人還隱薜蘿。那堪川上水，東逝乏迴波。

山居阻雨

霏霏風雨暗郊原，有客含凄獨掩門。山鬼嘯雲移峭壁，毒龍將海浸孤村。愁來自灑青楓淚，戰罷誰招絕  
漠魂。繭足空齋無一語，不因岑寂怨黃昏。

聞鶻

子規聲切月輪斜，起望諸陵憶漢家。婦女尋芳渾不解，鬢雲爭插杜鵑花。以上待清軒遺藁。

凌 晶

晶字山英，號石泉，華亭人。少習舉子業。宋亡，卽卷處。一放于詩，有古木風瓢集。

題機山

六峯喬木鎖雲根，青接平原數里村。此處無人來聽鶴，海靈山鬼哭黃昏。松江府志。

汪斗建

斗建，淳安人。生宋末，有雲畱小橐。

錢唐懷古

江上城低煙樹紅，江湖西去幾時東。吳宮花草隨春暮，禹會樓臺入夢空。萬里孤雲畱夕照，千年遺恨訴  
秋風。鳳凰飛去無消息，漠漠遙岑煙雨中。嚴州府志。

黃超然

超然字立道號壽雲黃巖人。

秋夜

秋近園林風露涼。蟲聲無數出頽牆。前朝舊事過如夢。不抵清秋一夜長。

黃巖英氣。

陳古遇

古遇平江人。元俞焯稱其詩高古。無宋末氣。不嫻于時。

志怪

沈沈萬仞淵。下有驪龍珠。佩之壽松喬。售之富侔都。貪夫臨淵羨。重利輕微軀。百金不龜藥。千金水犀珠。丹砂與翠羽。陸產海所無。齋裝濤浪中。巨闕光炯如。粲粲兩青童。駢肩何所須。再拜上珠翠。敢問龍起居。青童粲玉齒。雲龍臥元虛。爲君窮珠山。鞭雲取長驅。雲急風更惡。蒼梧來時徐。丹藥兩須失。哀哉飽鯨魚。

俞焯詩詞餘話云。立意

高遠不在建安黃初下。

馬別主

馬別主兮涕泗霑臆。士別主兮喜見顏色。于嗟馬兮胡戀而駐。于嗟士兮胡棄而背。

詩詞餘話云。哀忱

悽斷足以警世俗。

連文鳳 以下月泉吟社。

文鳳字伯正號應山三山人杭清吟社入月泉吟社第一名託名羅公福。

黃瀨月泉吟社序浦江吳渭字清翁號潛齋宋時嘗爲義烏令元初退食于吳溪延致鄉遺老方韶父與閩謝舉羽吳思齋主于家始作月泉吟社四方吟士從之三子者乃爲其評較揭賞云又送詩賞小割序月泉社吳清翁盟詩預子丙戌小春望日以春日田園雜興爲題至丁亥正月望日收卷月終結局收二千七百三十五卷選中二百八十名三月三日揭榜第一名公服羅一縑七丈筆五貼墨五笏第二名公服羅一縑六丈筆四貼墨四笏第三名公服羅一縑五丈筆三貼墨三笏第四名止第十名春衫羅一縑筆二貼墨二笏第十一名止二十名各深衣布一縑筆一貼墨一笏第二十一名止三十名各深衣布一縑筆一貼墨一笏第十一名止五十名各筆一貼墨一笏吟箋二卷。

春日田園雜興

老我無心出市朝東風林壑自逍遙一犁好雨秧初種幾道寒泉藥旋澆放犢曉登雲外壟聽鶯時立柳邊橋池塘見說生新草已許吟魂入夢招。

評云衆傑作中求其粹然無疵極整齊而不窘邊幅者此爲冠。

馮澄

澄字澄翁號來清義烏人月泉吟社第二名託名司馬澄翁。

前題

編闌春思倩吟鞭。著面和風軟似綿。黃犢烏犍秧穀候。雄蜂雌蜺菜花天。把鉏健婦踏煙籠。抱甕丈人分野泉。忙事關心在何處。流鶯不聽聽啼鶯。

評云。起善包括兩聯說田園的。而雜興寓其中。末語亦不汎。

梁相

相字必大。杭人。月泉吟社第三名。託名高宇。

前題

膏雨初晴布穀啼。村村景物正熙熙。誰知農圃無窮樂。自與鶯花有舊期。彭澤歸來唯種柳。石湖老去最能詩。桃紅李白新秧綠。問著東風總不知。

評云。前聯妙于組合。後聯引陶范。不爲事縛。句法更高。未借言雜興的是老手。

又梁必大。杭人。武林九友會。月泉吟社第十三名。託名魏子大。

麥疇連草色。蔬徑帶蕪痕。布穀叫殘雨。杏花開半村。吾生老農圃。世事付兒孫。但遇芳菲景。高歌酒滿尊。

評云。前四句詠題。後乃逃意。末二句亦不離春興。格韻甚高。五言中未易多得。

劉應龜

應龜字元益號山南義烏人月泉吟社第五名自署山南隱逸

前題

獨犬寥寥畫護門。是閒也自有桃源。梅藏竹掩無多路。人語雞聲又一村。屋角枯藤黏樹活。田頭野水入溪渾。我來拾得春風句。分付沙鷗莫浪言。

評云此卷七言凡六首律細韻高如耕餘樹有牛磨糞稅足溪無人照綴青春卻付鳴鳩管白日全輪臥犢閑此等語寬未易及鼎嘗一瓣餘可概知

魏新之

新之字德夫號石川分水人咸淳七年進士慶元教授月泉吟社第六名自署子進

前題

農圃誰言與世違。韶華正恐屬柴扉。天機花外聞幽哢。野色牛邊睨落暉。膏雨平分秧水白。光風小聚藥苗肥。行歌隱隱前村暖。忽省深山有蕨薇。

評云起有頓挫二聯善琢句善練字末意尤永

又第五十三名自署子直注曰分水魏石川

野景入時務。東風斲滿鋤。笛聲牛後出。酒味燕來初。穀種天心在。桑枝帝澤餘。紅塵幾飛鞚。官信有農書。



評云起句快便結意深遠兩聯亦高不得已屈實讀此

楊本然

本然字舜舉號龍溪金華人月泉吟社第七名自署栗里

前題

春風建業馬如飛。誰寫田園拂袖歸。栗里久無彭澤賦。松江僅有石湖詩。踏歌槌鼓麥秧綠。沽酒裹鹽菘芥肥。吳下風流今莫續。杜鵑啼處草離離。

評云起敘石湖出處善粘纒本題領聯引淵明爲對語有斟酌頸聯就范詩狀田園結有悠揚不盡之興此詩若止如前半篇則于義當屬賦矣

又第三十六名自署觀我注曰金華楊舜舉

露畦煙陌裏。名利等秋毫。引犢隨牛放。祈蠶望繭繰。和根挑薺菜。帶葉摘櫻桃。讀罷歸來賦。臨風欲和陶。

評云有點檢無疎漏二聯能以俗爲雅和根帶葉雖只舊對卻轉移得好末押和陶更佳

陳堯道

堯道字景傳號山堂義烏人月泉吟社第八名託名倪梓

前題

化日村田樂。春風耕織圖。秧肥科斗動。桑暗鶉鳩呼。罷社翁分胙。占蠶媪得符。傍花隨柳處。此事不關吾。

評云。起聯有力。五六亦新。傍花隨柳人多正說。此乃翻用之意新。

### 全壁

壁字君玉。號遜初子。杭人。孤山社月泉吟社第九名。自署全泉翁。

### 前題

倦遊歸隱白雲鄉。芳草庭閑晝日長。晉氏衣冠門外柳。甌人風俗屋邊桑。青林伐鼓村村社。綠水平疇處處秧。未分東風欺老眼。一編牛背臥斜陽。

評云。見趣高。格調別。觀前聯八字及末句語。可想其人。

### 呂文老

文老字澹翁。東陽人。月泉吟社第十名。

### 前題

月窟紀閏附青煒。民野陶然化日照。祀備粉榆祈稔歲。宴酣花柳樂清時。洛中富貴斜陽恨。綿上勛勞千古思。浩興歸來吟不盡。陶詩和後和齣詩。

評云。引用田園事。全與諸作不同。覃思一至于此。末句亦纒密。

方德麟

德麟字藏六。桐江徙居新城。月泉吟社第十一名。託名方賞。

前題

繞畦晴綠弄潺湲。倚杖東風卻黯然。往夢更誰憐秀麥。閑愁空自託啼鶯。犁鉏相種地方盡。花柳無私春色偏。白髮老農猶健在。一蓑牛背聽鳴泉。

劉汝鈞

汝鈞字君鼎。號蒙山。三山人。寓杭。月泉吟社第十二名。託名鄧草徑。

前題

年來夢斷百花場。安分農桑萬慮降。爲喜麥青行暖徑。因看蠶出倚晴窗。草坪閑見烏犍點。畚水飛來白鷺雙。滿飲茅柴拚爛醉。踏歌社下自成腔。

評云。意圓語妥。五六善寫物態。用韻尤工。

何鳴鳳

鳴鳳字逢原。分水人。宋時嘗爲教官。月泉吟社第十四名。託名喻似之。

前題

東風轉颺又東臯。久賦將蕪力未薶。古木一作屋陰深巢燕弱。荒陂水淺怒蛙豪。兒癡方擬半栽秫。身隱尙嫌全種桃。何許歲徵君欲采。飢眠堪羨華山高。

評云語健意深。雖首句疊字微。

欠推敲。後聯與末韻過人矣。

又第四十五名。託名陳緯孫。注曰。分水何教鳴鳳。

星明天駟兆興農。稼圃犁鋤處處同。播穀競趨新禹甸。條桑猶記舊幽風。草綠犢吠縱橫綠。花隔藩籬深淺紅。自笑偷生勞種植。西山輸與采薇翁。

評云雋味寓于細律。

中微作者不及此。

翁合老

合老字仲嘉。建德人。月泉吟社第十五名。自署躡雲。

前題

韶華到處入冥搜。郭外人家事更幽。土脈正融催穀棘。林陰微合聽鉤輅。誰家酒熟社公醉。明日桑空蠶妾愁。祇恐春工一作東風忙裏度。又吟風雨滿城秋。

評云春日雜興意已具首句二聯工緻後聯句更高結句所引與興字相關尤有深味

林子明

子明號東岡分水人月泉吟社第十六名自署玉華吟客

前題

一點陽和薰萬宇最饒佳致是山莊雞豚祝罷成長席鶯燕聽來隔短牆嗜酒不嫌多種秫無襦長恨少栽桑東郊勸相何煩爾農圃吾生自合忙

評云前聯細玩見田園次聯較分曉結意尤有含蓄

劉蒙山

蒙山崑山人月泉吟社第十七名託名田起東

前題

桑風吹綠滿原頭西崦東臯暖氣浮村婦祈蠶分麩親老農占歲說泥牛田烏飛逐耕煙犢桑扈鳴隨喚兩鳩鄰叟一作曲相邀同社飲旋將新酒向花籬

評云此真雜興

二聯組織甚工

周 暎

暎字伯陽，號方山，秦州人。武林社月泉吟社第十九名，自署識字耕夫。

前題

蛙聲似吹雨初足，桑椹欲紅風始和。少婦每憂蠶利薄，老夫唯喜秫苗多。舊栽花木山鶯識，新買陂塘野鷺過。此境東風元自好，當年金谷事如何。

評云：不事排募而意

語新妥，自是佳作。

月泉吟社送詩賞小劄，羅公福云：代以月泉舊社，久盟湖海之交。春日新題，贍寫田園之興，得周南而正始，可冀北之空羣。執事振響武林，舒翹文苑，種秧澆樂，已朝市之無心。放犢聽鷺，更池塘之入夢。杼機自別，冠冕爲宜。某心所甚欣，手之不釋。詩成奪錦，誦珠玉者翕然。禮以爲羅，媿瑤瑤則多矣。餘如元穎，并致篋筐。司馬澄翁云：執事清涵繡湖，香並班史。棠花天秧穀候，偶迎著面之風。野泉鑿烟隴，翠總是關心之事。雖居蕭次，猶占虛前。高宇云：伏以友連湖海，夙聞詩錦之名。願借田園，尙媿禮羅之意。有來匡鼎，豈遜盧前。執事文陣稱雄，武林擢秀。四時春始，成石湖老去之吟。三徑人閒，得彭澤歸來之趣。襟期樂只，蠶穎宜哉。某得是高吟，從而深刻。問巢父之珊瑚，安在此則長雷。縱衛人之瓊玖，可將終然。匪報倪梓云：田園雜興，偶徵舊社之同盟。湖海俊游，爲賦長城之五字。執事假富春山爲通德里，耕織圖村田樂，放開塵外之懷。社翁昨蠶媪符，道盡眼前之景。以俗爲雅，此詩可羣。全泉翁云：執事東晉衣冠，西廂風俗。閑庭芳草，倦游甘隱于白雲。綠水新秧，歸牧穩眠于斜日。卓爾有立，異乎所聞。躡雲云：月泉壤地，密依鄰燭之光。春日田園，贍喜奚囊之興。翮其傑製，壯我齊盟。執事絲瀨清風，爐峯瑞氣。土脈融林，陰合。搜吟不敝於韶華。社公醉蠶妾愁，敗意直憂于秋雨。誠爲着勁，可但清新。識字耕夫云：農圃餘生，結同盟之社友。湖山佳處。

有識字之耕夫。所謂伊人。夫豈卑我。執事語無排慕。體不效崑。  
野鷺山鷺。勸金谷當年之感。婦蠶夫穉。逼石湖春日之吟云云。

送僧歸蜀

詩禪寄杖錫。不問道塗難。到水浮杯渡。逢山卸笠看。悟空諸念寂。傳佛一燈寒。蜀國又歸去。令人憶道安。  
翰墨大全。

姚潼翔

潼翔家釣臺。月泉吟社第廿一名。自署社翁。

前題

壁寫新年百事昌。春盤次第蓼芽香。燒燈過了爭挑菜。祭社歸來便撒秧。布穀幾聲催耜畝。吳蠶三伏正  
條桑。一春忙過無多日。又聽鸕鷀報麥黃。評缺。

高 鎔

鎔字聲玉。號悅雲。三山人。宋婺州教官。入月泉吟社廿二名。自署騎牛翁。

前題

已學淵明早賦歸。東風吹醒夢中非。鶯聲睨睨來談舊。牛背安閑勝策肥。時聽樵歌時牧笛。閒披道弊閒  
農衣。篇詩那可形容盡。何似忘言對夕暉。

評云五六作意就雜字上形容略似爲氣格之累  
然而不可少也第二句穎拔未用潤明意尤佳

吳瑀

瑀字貴叔義烏人吳天祐之姪月泉吟社第廿三名自署天目山人

前題

野水渾邊戲乳鵝疎籬缺處曬耕蓑草青隨意牛羊臥門靜無人燕雀多夫倦倚犁需婦饁翁歡擊壤和  
孫歌新來別有營生計又喜巡檐住蜜窠

評云全篇是雜興本色而田園參貫其中且無一語壓腐

胡南

南字景山號比心義烏人月泉吟社第廿四名自署安定書隱

前題

世數有遷革田園無古今鳥喧爭樹暖牛倦憩牆陰水活土膏動風微花氣深淵明千古士佇立此時心

評云二聯入細末意尤永

黃景昌



景昌、浦陽長塘人。月泉吟社第廿五名。自署槐窗居士。

前題

野色搖春麥正肥。烟村閑寂往還稀。未多桑葉蠶初浴。更小茅茨燕亦飛。行市綠蛆花潑眼。臥依黃犢草侵衣。數聲桐角歸來晚。楊柳移陰月半扉。

評云。細潤中見雜興。若知田

園傳亭。則有當進盧前矣。

姜霖

霖字仲澤。金華人。月泉吟社第廿六名。自署姜仲澤。

前題

老盆傾酒試新嘗。社鼓村村鬧夕陽。麥隴風微牛睡穩。芹塘泥滑燕歸忙。半村飛雨斷烟溼。一徑落花流水香。鼎貴安知此中意。徒能學犬吠村莊。

評云。韻聯妥貼。五

六尤勝。末不雷同。

東必曾

必曾字孝先。號潮原。杭人。武林社月泉吟社第廿七名。託名陳柔著。

前題

暎綠郊原春事深。治生幽趣豁襟襟。聲禽語耕人意。種種花開老圃心。桑葉漸舒梯欲整。麥苗暗長路難尋。日長雖有荷鋤倦。薄暮歸來常醉吟。

評云。終篇可謂清新之作。三四尤有味。

### 方子靜

子靜、桐江白雲村人。月泉吟社第廿八名。自署方尚老。

### 前題

東臯雨後土膏肥。夙駕烏犍出短扉。秧水平疇蛙閣閣。菜花滿稜蝶飛飛。比鄰社酒歡猶在。牆壁農書事已非。獨喜桑麻今正長。淵明歸去最知幾。

評云。領聯停當。五六有感觸三四字尤警。

### 朱孟翁

孟翁、東陽人。月泉吟社第廿九名。

### 前題

餽釘蔬粢已竹萌。如何布穀未催耕。牧兒懶散騎牛過。遊子牽連信馬行。秧際窺魚翹白鷺。花開捎蝶下黃鶯。東風歲歲添新綠。獨我霜髯多幾莖。

評云平安中用字有工二聯不  
拘體貼而題自見未感興深

月泉吟社送詩賞小劄天目山人云月泉社友爰歆舊盟天目山人爲題春興不勝佳甚豈果遠而執事望邑鄰輝平齋宗派  
詠牛羊茁壯仍觀戲水之乳鷄知燕雀生成又喜巡簷之窠蜜有噉其髓或拊而歎安定書隱云執事昔者中庸今之安定趣  
雄物表牛倦鳥喧景入用中風微水滑且能慕義熙之士豈欲追正始之音槐窗居士云執事名稱東國越之雄句比西家施  
之麗洛鸞飛燕野色搖春依犢市蛆扉陰移月攀成小景曲盡巧心姜仲澤云月泉里社竊雙溪明月之餘輝春日田園動白  
雪陽春之絕唱執事探撫羣言牢籠百態歸燕忙睡牛穩頗歡顏社酒之嘗斷烟溼流水香更切齒村莊之吠高標聳若秀句  
宜哉方向老云秧疇麥稜畫圖巧寄于壑中社酒農書詩史隱存于言外烏龍嶺之地靈尙矣白雲村之宗派依然某薄云等  
獻并以

穎歸

鷄按小劄

朱孟翁缺

### 陳舜道

舜道義烏人月泉吟社第三十一名自署陳希邵

### 前題

春來非是愛吟詩詩是田園樂興時清入吟懷花月照紅生笑面柳風吹村聲盪耳烏鹽角社酒柔情玉  
練槌閑悶閑愁儂不省春來非是愛吟詩

春來非是愛吟詩。詩是田園遣興時。行傍山翁驅犢父。坐觀鄰媪試鵝兒。看秧時測水深淺。行菜闌占春早遲。白日漸長消不去。春來非是愛吟詩。  
春來非是愛吟詩。詩是田園感興時。草地耕牛才有犢。花村吠犬那能鼈。麥青未必三時粥。桑綠其如二月絲。觸物興懷言不盡。春來非是愛吟詩。

評云。此卷首尾吟十篇。題上生題。摹寫各極其妙。與其他畫蛇添足者不同。姑實諸此。以爲手抄之冠。紙價當爲高矣。

劉時可

時可雙溪人。月泉吟社第三十二名。

前題

土膏初動雨初收。草徑茅亭趣最幽。坐睡略無朝市夢。踏歌時有里閭遊。半丘秧秫醉堪酒。五畝樹桑寒可裘。老圃老農誠足學。不成吾道付滄洲。評缺。

許元發

元發義烏人。月泉吟社第三十四名。自署雲東老吟。

前題

片雲豈是出山時。曾被東風誤一吹。歸意不煩啼鳩勸。閑情只許落花知。桑麻窮巷扉常掩。烟火空林黍自炊。栗里輞川非謬計。晴窗子細味渠詩。

評云起善摹寫五六用淵明摩詰語卻以第七句承之可謂得格

洪貴叔

貴叔義烏人月泉吟社第三十五名自署避世翁

前題

棄官杜甫罹天寶辭令陶潛歎義熙暖日浣溪仍舊迹春風栗里只前時  
苗生阡陌培嘉種花繞林塘發故枝佳興二公能領會可能胸次太多詩

評云全微坡體

徐端甫

端甫義烏人月泉吟社第三十七名

前題

曉出東郊跨蹇驢弄晴微雨潤如酥犬依桑下烏犍臥鳩雜花閒黃鳥呼  
楊柳嫩搖風氣力稻秧新著雨工夫農家滋味誰知得飽飲豚蹄酒一盃

評云如是而後爲雜興詩中二聯尤得趣末無奇

朱釋老

釋老、號龜潭。金華孝順鎮人。月泉吟社第三十八名。

前題

家山萬象春歸好。詩筆拈來感物情。泉脈動時毋待灌。土膏起處正宜耕。無窮懷抱風和暢。不盡形容雨發生。試問封侯萬里客。何如守拙晉淵明。

評云。前聯說田園輕快。第二句體貼興字。五六帶春

景體貼雜興二字更工。然而氣格不甚高。亦坐此。

李萼

萼、桐江人。月泉吟社第三十九名。自署樵逸山人。

前題

村居只是舊衣冠。北墅南園熟往還。雨外泥深牛轂棘。花邊風暖鳥閒關。躬耕自得莘郊樂。日涉誰知陶徑閑。只說桑麻元自好。不須釋耒歎時艱。

評云。全篇辭氣雍容。末韻哀

不傷。怨不怒。深得詩人之旨。

陳公凱

公凱、字君用。號竹懼。月泉吟社第四十名。自署柳圃。後爲月泉書院山長。

前題

春風穴我田園務。野思芳情約不齊。檢點瓜丘仍芋壠。按行桑墅更秧畦。偶陪靈運山前屐。或學東坡雨外犁。薄暮倦歸專一事。旋誅生菜甕黃齏。

評云。詠雜興甚工。但失之

刻露。然其好處亦在此。

又第四十六名。託名陳鶴舉。

世事不挂眼。寄情農圃中。鉏犁衝曉雨。杖屨立東風。芽穀驗仁脉。澆花趨化工。獨餘真意味。濁酒自燒菘。

評云。前聯平。

後聯有思索。

俞自得

自得號吟隱。金華孝順鎮人。月泉吟社第四十二名。

前題

暄和春景好。供詩日暖風輕。土脈肥。白鷺時窺秧刺刺。黃鶯頻說柳依依。幾回野水聞姑惡。數樹春陰叫姊歸。物態滿前看不足。等閑吟詠對斜暉。

評云。語新而對巧。所謂多識于鳥獸草

木之名。但末二句。不過敷演起句耳。

王進之

進之、建德人。月泉吟社第四十七名。自署臨清。

前題

桑田滄海幾興亡。歲歲東風自扇揚。細麥新秧隨意長。閑花幽草爲誰芳。午橋蕭散名千古。金谷繁華夢一場。滿眼春愁禁不得。數聲啼鳥在斜陽。

評云。有悠長味。無艱澀。語後半篇視前略不及。

又第四十九名。自署王進之。

東君私我此身閑。脫卻青衫野服更。桑可以絲麻可績。麥宜續食韭宜羹。分甘壘上耕雲隱。夢不湖邊拾翠行。物意豈知滄海變。曉風依舊語流鶯。

評云。以雅健語寫高潔操。悠然之興。見于篇末。

陳希聲

希聲、義烏人。月泉吟社第五十名。託名元長卿。

前題回文二首存一

香紅眩眼纈蕤英。竹杖扶吟縱步行。桑眼墓含青蕾小。麥鬚蝦磔翠芒輕。黃花菜圃午風軟。綠水秧畦春



野平芳樹幾聲鳩。雨過蒼蒼柳色弄烟晴。

評云。回文二首俱。

妥順亦出苦心。

又第五十一名。託名聞人伯仲。三首存一。

田園興在早春時。眼纈生紅喜上眉。門巷日高人埽雪。池塘烟漲水流澌。杯杓新歲歡同社。燈火元宵鬧古祠。野老告余春事及。夜來小雨過前陂。

評云。三春分作三首。曲盡變

態。非苟爲敷演者所能及。

戴東老

東老月泉吟社第五十二名。

前題

飲了椒盤收了燈。翁攜稚子步新晴。茅柴初熟勝臘醞。菜菔久齋宜晚羹。伏卵雞留上春種。出欄牛試吉辰耕。去年官賦今年罷。寂甚門前犬吠聲。

評云。狀三春之景。得處

亦多起頭一句欠嚴重。

陳文增

文增 苕水人月泉吟社第五十四名

前題

熙熙壠畝扇和風。蔌蔌人烟野意濃。培溉桑麻沿汲路。徑行薺麥省耕農。飲牛澗暖山搖影。接果枝青蘇  
拆封酒熟花香村欲社。芒屨藤杖儘從容。

評云起見題意兩

聯中五六尤工

月泉吟社摘句圖

無機老農云名利有危機。老子農圃宜。

子間云驅卻餘寒碎土牛。田園生計又從頭。

田農夫云桃李場中已免參。只將農圃繫頭銜。

唐人機軸云風暖柴荆鳥語幽。麥高麻矮野桑柔。以上起句。

忘懷老人云寸地不可棄。東風何處無。

五雲山人云種瓜思夏實。分菊待秋花。

老農云幸存耕雨地。況值養花時。

劉存行云麥苗花下綠。犢子草邊黃。

石姥寄客云水暖眠秧珥。風香豔茗旗。

雙澗云。雨露桑麻深夜話。清明花柳少年心。  
雲水云。晴雨花時遊子意。寒暄秧信老農心。  
白雲人云。犢外醉分芳草臥。鶯邊吟踏落花行。  
傅宜山云。生意滿腔秧出穀。飛花有思柳飄絲。  
自家意思云。耕鋤曉雨有餘地。應接東風無暇時。  
柳耆云。野犢正忙犁曉雨。谷鶯纔出管東風。  
俞如山云。鳥隨牛後窺秧穀。蝶趁蜂來戀菜花。  
跨犢者云。有酒便嘗烹筍蕨。無花聊自賞桑麻。  
□□云。社近記穿黃繭子。雨前趨摘紫槍旗。  
山野人云。鶯藏楊柳金歌舞。蝶宿梨花雪夢魂。  
盤隱末子云。桃林我憶放牛日。葵圃誰思逸馬時。  
扶杖夫云。一生甘作扶犁手。萬變寧移抱甕心。  
廷雲云。蛙鳴暮夜官何爲。蝶戀芳菲夢不知。  
翁自適云。鴉趁犁翻爭啄食。蜂黏絮落苦貪香。  
郭建德云。烟連草色迷平野。雨趁鳩聲過別村。  
歸餽賓云。烹罷擗龍新上箸。修來秧馬尙依牆。

陳帝臣云。清曉蛙聲引啼鳩。夕陽牛背立歸鴉。  
晚靜云。牛飲芳陂。鴉立背馬過。秀野蛙隨蹶。

竹蓑笠翁云。蠶一二眠催出伏。秧三四葉尙憂風。

俞野處云。郎罷耕歸呼困牧。阿翁眠起問姑蠶。以上聯句。

藍田道人云。晴原望新麥。一片綠雲香。

林泉生云。桃李公門者。將蕪胡不歸。

傅九萬云。笑他思著蓴鱸者。卻感秋風始去官。以上結句。月泉吟社。

鄭協

溪橋晚興

寂寞亭基野渡邊。春流平岸草芊芊。一川晚照人閑立。滿袖楊花聽杜鵑。

錢唐晚望

錢唐江上夜潮過。秋靜寒烟白露多。吳越青山明月裏。舟人齊唱異鄉歌。以上天地閒集。

徐直方

直方字古爲。

觀水

滄江無盡水。夜夜隨潮去。若復作潮來。滄江止不住。天地閒集。

何新之

新之字仲德號橫舟西安人仕至樞密院編修官後知忠安軍死節有詩林萬選

秋夜汎舟

飛星曳寒影野水淡碧空人生定何物扁舟空影中何年有宇宙生此木末風有力不向上難到蓬萊宮  
空攀樓鶴巢搔首如飛蓬俯仰慨今昔此懷安可窮天地閒集

王仲素

仲素號石髓

歸去詞

種松雨濯髮折筍春墮指長嘯歸去來滄江一天水天地閒集

何天定

天定號菊屋

散策

孤坐忽不樂出門聊散行溪喧亂人語樹偃礙農耕雨徑莓苔積陽陂草木明道逢九十老相對話承平

天地閒集

王曼之

曼之號野處

西窗

西窗枕寒池。池邊老松樹。渴援下偷泉。見影忽驚去。

春日郊行

出門逢柳色。忽過野橋西。坐石看潮長。隔花聞鳥啼。地隨芳草盡。樹與夕陽齊。不是桃源路。行人亦自迷。  
以上天地閒集。

范協

協號觀山。

年年

年年如燕一還家。又訪幽居過水涯。風雨滿城春欲暮。山中猶有碧桃花。  
天地閒集。

吳子文

子文號東窗。

訪隱者不遇

道人入山訪道人。山深俗朴雞犬馴。道人不見道人去。豨豸草木無邊春。  
天地閒集。

韓竹坡

采菊

擷我百結衣。爲君采東籬。半日不盈掬。明朝還滿枝。悠然何處是。千古正如斯。  
天地閒集。

唐 涇

涇字清父。道州龍山人。

甲戌客臨安

時買似道當國

金谷烟花醉未醒。軒邊無夢到功名。十郎腹裏長函劍。六丈胸中舊貯兵。天豕星沈狼有影。海鱗風緊鶴無聲。如聞浩浩愁相訊。何日衣冠樂太平。

江南紀事

吳山一髮暮雲孤。愁向湘纍訊故都。鳳去只餘韶樂在。雁來還有帛書無。杏壇有客陳孤注。平隴何人復五銖。歌徹黍離風雨惡。南山深處叫烏烏。

廣亡徙海

箕冠如櫛擁茅旌。誰執駢毛畝晉盟。遵海而南關氣數。渡江以北少功名。火旗晦靄雲藏闕。水陣周遭雪壓城。一榻不容人鼾睡。那知霧島是神京。

崖山亡

萬里輿圖入朔方。搖搖孤注海之陽。石尤風惡雲藏軫。天驪星沈月掩房。島上有人悲義士。水濱無處問君王。羲和指著烏飛路。去去虞淵暮色蒼。以上忠義集

彭秋宇

乙亥紀聞

羽書朝暮漲氛埃。天詔勤王起草萊。塞上風高鷹隼去。江頭霧暗馬飛來。諸賢忠愛謀安出。四將英靈喚不回。漠漠雲天秋萬里。飛鳴無數雁鴻哀。

秋興二首

沙塵破褐客秋風。落落親朋半老翁。野曠有時聞嘯虎。天寬無處寄征鴻。四方玉帛燕山北。萬里帆檣海水東。回首可憐歌舞地。方花石礎樹陰中。西風卷地送淒涼。目斷歸帆落日黃。雁過江天雲漠漠。龍遊滄海水茫茫。故人入夢三更月。近事驚心兩鬢霜。試把濁醪澆磊魄。尊中猶帶芷蘭香。以上忠義集

劉麟瑞

麟瑞號如村。南豐人。有昭忠逸詠。

西和知州陳公寅守將楊公銳

陰風蕭颯起黃埃。鐵騎追奔動地哀。石堡梯空天險北。水門釁隙殺機開。不期溟海鵬千里。自守封疆鶴一杯。四十萬民登鬼錄。伊誰爲使哭聲哀。

階州守臣董公鵬飛

相傳報怨撼階州。虎旅飛來睨敵樓。楛矢蔽空天入暝。鵝車衝壘地生愁。金城魚肉千年恨。闔境衣冠六日休。莫怪傳家猶強項。雲孫忠節更風流。

丞相江公萬里知府江公萬頃



名重天關侍少微。昔年南國秉樞機。人歸綠野身猶健。兵滿紅塵世已非。止水亭前風淅淅。鄱陽城外草依依。棣華相映人閒瑞。節惠隆名世所稀。

丞相信國公文公天祥

金字牌飛出建章。鬱孤萬壘爲勤王。驅馳嶺海君臣寓。囚繫燕雲道路長。六籍一時光日月。孤忠千古立綱常。元歸凜凜渾生氣。南北人誇姓字香。

湖南安撫知潭州李公芾

平楚樓頭矢石驚。焚香稽首別宸京。盡殲妻子期全節。寧死封疆不忍生。烟燄張空隳趙壁。旌旗倒影下湘城。善刀人在同觀化。名與澄江一樣清。

江東運判趙公淮妾某氏

石頭城昔號金湯。岌岌孤墉戰馬場。西日突圍逃溧水。南冠荷校說維揚。血凝漢節誇男子。身寄秦淮藉女郎。千載妾身貞更潔。仰天哭向水雲鄉。

淮東制置使李公庭芝

淮海曾聞一偉人。十年臥護息邊塵。重來鐵騎攻城急。旋執金戈赴陣頻。夢入甌閩期立極。路遵通泰條捐身。平山堂下悲風起。魂繞瓊花萬樹春。

參政高公應松

腸斷吳山錦繡叢。六更聲絕海潮空。千門鎖月移行在。八駿乘風憩會同。扈蹕孤臣慙主辱。征鞍萬里哭

途窮兩宮緩趨朝。陞回首天南獨死忠。

丞相陸公秀夫

八面兵威八面攻。馮夷飛血洗千蓬。波翻水寨乾坤震。風仆檣旗社稷空。百辟散班奔鷁首。孤臣扈蹕憩龍宮。茫茫南國重回首。一片丹心照海紅。

樞密張公世傑

曾擁貔貅奏凱歌。匡山雲暝竟蹉跎。地空九有棲荒服。寨列千艘保海阿。龍躍壘沈天若此。烏鳴矧絕事如何。鯨波沃日炎光熄。凜凜英魂尙枕戈。

江東制置使謝公枋得

草履麻衣漫蔽形。十年賣卜慣零丁。願從楚地師鬪勝。欲向遼城友管寧。采石吟成期絕粒。娥碑讀罷棄餘齡。一門盡節均無媿。千載西山疊疊青。

少主納款

天目山崩歷數終。降幡颺颺出孤墉。六龍捲霧歸三島。八座迎風啓獨松。塵掩玉塔消王氣。潮移雪屋示軍容。由來興廢天難問。斷礎頽垣泣曉蛩。以上昭忠遺詠。



宋詩紀事卷八十二

錢唐厲鶚輯

歸安費樹榘勘定

蘇元鼎

遊齊山寺

秋浦齊山寺。峯巒楚楚長。巖根堆雁塔。溪角架虹梁。雨過聞幽磬。雲開見上方。苔侵石磴滑。花擁洞門香。禪客探元切。騷人覓句忙。汲泉寒井廢。觀郡古樓荒。白鳥巢危樹。孤猿叫斷岡。碑珉黃閣相。詩板紫薇郎。蹤跡依稀在。文章大半亡。登臨正吟賞。惆悵見斜陽。齊山詩集

石 郊

石梁寺

行破白雲山幾里。僧牀接客幸相容。泉聲到枕夜無寐。時聽隔林方廣鐘。天台山志

劉師邵

浮萍

乍因輕浪疊晴沙。又趁迴風擁釣槎。莫怪狂蹤易飄泊。前身不合是楊花。廣羣芳譜

葉 籟

題光華亭

在鹽官縣北

畫棟朱簾勢翼然，鼎新氣象冠山川。  
鵝黃楊柳浮春晚，鴨綠烟波送客船。  
輪奐不妨農事日，風光好近麥秋天。  
佐君治簡有餘暇，杯酒從教盡日傳。  
海寧縣志

黃唐

九女山

在奉化縣南二十里

粼粼新綠起前峯，拂拂垂楊烟雨中。  
安得一蓑浮短艇，玉鱗飛上釣絲風。  
寧波府志

史蘊

國清寺

十里松關路，門開對洞天。  
山神曾獻地，海衆此安禪。  
鐘磬開巖谷，樓臺跨石泉。  
高峯智者塔，長與赤城連。  
天台山志

魏宗

石橋

聞說招提景，曇花結翠雲。  
晴光朝更合，嵐氣晚來分。  
梵語微茫韻，鐘聲杳靄聞。  
無由問禪法，坐對柏爐熏。  
天台山志

路忱

秋懷

落日雷虛壁。秋風急戍樓。高歌鬼神夜。揮涕虎狼秋。豪貴少青眼。文章多白頭。何時挂長劍。天地一扁舟。  
宋藝圃集。

況志寧

南昌人

豫章臺

城陰冷落豫章臺。平地晴沙捲雪來。欲訪鄰翁問塵跡。小園荒徑長莓苔。

梅仙壇

上疏歸來事可歎。嶺頭誰爲築星壇。先生不食炎劉祿。自拾松花當晚餐。  
以上南昌府志。

謝孚

蒼梧卽事

近岸江聲急。孤舟下杳冥。峽泉飛暴雨。灘石走羣星。水有瀟湘色。猿同巴蜀聽。令人思舜德。一望九疑青。  
粵西詩載。

張惟中

鏡湖

昔年曾過賀家湖。今日烟波太半無。惟有一天秋夜月。不隨田畝入官租。  
紹興府志。

廖衡

衡南劍州順昌人。鄉舉不利。隱居終身。

句

淚多陳后愁離殿。浴出楊妃困倚闌。

延平府志。縣尉命詠。

雨中山茶。時年六歲。

艾中

遊疎山

夾道蒼松六月寒。塵埃只隔白雲閑。重游恰是十年後。往事空驚一夢閒。傑閣漫誇新卜築。危亭不似舊躋攀。憑誰說與□師叔。投老求分一半山。撫州府志。

徐 靈

綠珠渡 在粵西博白縣

早出綠羅村。晚過綠珠渡。日落白州城。草芳梁女墓。江水流古今。滔滔不相顧。今人不見古時人。依舊青山路如故。名勝志。

呂 江

栖白菴

門外竹千箇。崖巔兩徑分。奔泉流碎月。高樹礙行雲。游客倦欲臥。道人言少文。但云秦學士。曾此遇茅君。

單錫

錫字君賜，宜興人。

寄隱士

巖頭鬱鬱凌寒柏，柏閒時復雲封白。苔蒼草碧自年年，絕奇中有參同客。道通下躡天根深，山靈啼泣穹

崖陰，春深不問花開落，寂寂空山千萬尋。宋藝圃集

賈成之

橫槎三月江如束，風浪縈紆接天綠。郡樓新創插雲飛，盡日江山對雙目。粵西詩載

夏之中

古離別

郎上孤舟妾上樓，闌干未倚淚先流。片帆漸遠郎回首，一種相思兩處愁。宋藝圃集

柳驥

驥官德化主簿。

句

天插一泉聲漱玉，地高六月夜凝霜。題九仙山 泉南雜誌



范西堂

明水寺

環山清淺一溪水，夾徑高低十里松。煙鎖石門疑路斷，斜陽影裏忽聞鐘。撫州府志。

陸煥

大慈寺

天下紛紛吹戰塵，我來佛隴悟修身。依然猿鶴如相識，知是中山幾世人。台州府志。

祝鑄

鑄蒼山人

妙庭觀

風雨連山松竹鳴，宦途牢落若爲情。中宵嘹唳驚殘夢，疑是雲和重度聲。杭州府志。

朱應龍

山月池德藏寺有松風臺山月池菊坡宋竹菴禪師所築

池底看明月，明月在山頭。清光連上下，分作兩輪秋。

菊坡

口有綺語債，長詠菊坡詩。最好重陽景，雞肥酒熟時。自注：竹菴禪師有菊坡棗。以上柘上遺詩。

胡梅所

石禪牀在鷓鴣山

空山危石平如掌。雲鎖苔封自昔時。不識山僧曾坐處。幾回彈舌雨龍歸。漳州府志。

程驤

富順西湖

春風楊柳早藏鴉。秋水芙蓉晚著花。細數一年湖上景。天涯行客忍思家。全蜀藝文志。

衡泌

綠波亭

清淚斑斑灑綠波。年來轉覺別離多。扁舟南浦分攜處。水遠山長愁奈何。建寧府志。

潘景良

游金山

嵌巖穹窿屹立乎江中。崩湍下瞰不見底。巨石岬出高摩空。混沌破來到今幾萬歲。雄奇秀麗胡爲乎此。山兮獨鍾。長江西來一萬里。當空削出金芙蓉。上有金仙居。下有馮夷宮。寶坊櫛比列霄漢。塔影倒置驚魚龍。有時洪鐘咽烟響。潮音屬和驅羣鸞。鳥飛竟力不得到。我嘗挈舟一抵其雲峯。攝衣步樓閣。矯首觀無窮。齊州九點落眼底。岷峨西望何溟濛。忽聞長風破巨浪。芥蒂一洗平生胸。山僧喜殊常。握手何從容。杯擎陸羽水。茶汎玉川風。鶴翁散仙恆齋老翁。把臂大笑聲融融。天風吹袂欲輕舉。白雲縹緲將何從。不知海外之三山。羣仙之樂。與此將異而或同。迄今別去五六載。我舟又復來掀篷。山靈偃蹇我倨傲。塵懷

汨沒不得追前蹤。風帆一笑金山過。山頭日落飛冥鴻。金山志略。

楊旻

題惠山翠麓亭

聞說支公最好賢。瀛洲可買不論錢。樓臺蔽日都無地。草木藏春別有天。石上雲翻千峽雨。洞中泉落幾家田。高閑誰似幽居樂。一坐青山不問年。惠山集。

徐文瀾

詠酒

才傾一盞碧澄澄。自是山妻手法成。不遣水多防味薄。要令麴少得香清。涼從荷葉風邊起。暖向梅花月裏生。世味總無如此味。深知此味卽淵明。淵鑑類函。

侯丹

學古體

桐風吹月烏啼井。碧波溼露沈雲影。素絲牽玉轉泉華。美人睡覺燕支冷。銀鈎挂簾北窗曉。翠鬢臨鏡雙鸞小。黃衫少年望不來。寂寂庭階滿春草。吳氏詩永。

林東

戴溪亭在望仙門外。

溪亭故事幾年華。來值秋霖眺望賒。雲障山巒多少處。雨埋烟火兩三家。水肥去馬行高阪。汀沒浮鷗上

淺沙。誰是子猷。誰是戴。小船杯酒興無涯。嶺縣志

陳揆

破山寺雙頭白蓮

湘南夜永風露清。明月耿耿波益平。嬋娟有人步羅襪。瓊瑤玉佩雙娉婷。可憐玉骨埋藏久。腸斷人間無復有。豈知化作蘭若蓮。宿契未忘猶並首。想應快意洗塵緣。不向謝池爭取妍。玻璃盤中淨玉頰。一心稽首西方仙。請君以圖獻天子。當與嘉禾並周史。毋令寂寞墮空山。泣月悲雲清夜殘。破山寺志

藍元威

寒

朔風陣陣送將來。日午柴門半不開。靈照只教添短褐。孟光重喚暖深杯。苦吟簷角玲瓏玉。閑撥爐頭榼。樵灰移步東籬紅。日晚細看凍螭尙依梅。菊坡叢話

司馬允中

陸羽井

百尺寒泉浸崖腹。蘚蝕題名不堪讀。只今此味屬誰論。自把銅餅汲新淥。虎丘志

慕容百才

大劍山

李勢非嶠虎。公孫是井蛙。聖朝無外戶。夷壤盡爲家。疊嶂寧須鏟。停叢久廢撾。原鱗生駱谷。釣駟入彭衙。

關失千年壯。方來萬里遐。商淵寧瀕洞。使節偏給劄。岑蔚誰驚鳥。豐菱自樂麕。烽屯開雨雪。樵爨老烟霞。帝德朝宗地。仙游上漢槎。賞奇酬酒興。攜藻謝詩葩。階走楓林葉。窗催柏燭花。山亭無刻漏。隱几待鳴鴉。  
四川總志。

袁植

游惠山

挈舟到山寺。詩句偶緣情。山自錫無後。寺因泉有名。樓陰回夕景。樹色向冬榮。就水別茶味。全勝他處烹。  
惠山集。

陳願

斗起亭

乞得雨初霽。登臨一解顏。自攜斑竹杖。來對白雲山。月色朦朧裏。溪聲遠近間。相留且盤礴。莫惜夜深還。  
台州府志。

劉琰

題尊勝院  
在奉化縣。

海角尋春雪未消。馬蹄無處避瓊瑤。已分屋下論文酒。爐火篝燈伴寂寥。  
延祐四明志。

王曄

芙蓉

蘭菖初舒豔。奇芬暈碧霄。中洲欣邂逅。南浦自招搖。瑩色涵香霧。新袍坼絳綃。娉婷自珍愛。禮郁更清超。  
照水臨青鏡。僂蘋倚彩翹。駢枝疑貫寵。並萼似爭嬌。綽約霞初映。披敷烟正銷。鬢蕤金粉嫩。房闔玉冠喬。  
月下仙人斲。風前公子袍。清虛雲步溼。沈浸灤津饒。濯濯靈修質。盈盈神女標。孤貞無漫蔓。雅則絕纖妖。  
喜勗文鴛舞。光搖錦鯉跳。瓊根託紺潔。翠蓋障炎囂。靚賞聯瑤席。芳寒集桂橈。姚園多猥俗。陶徑亦蕭條。  
華井分流潤。天池引派遙。須移元圃種。莫向若邪漂。木末興幽詫。瀛溪結冥招。懷之思遠道。秋入鬢蕭蕭。  
廣羣芳譜。

何昌弼

橫塘道中 即半邏北橫塘舖。

一舸凌風去。縈紆幾度村。水清魚引子。田美稻生孫。山近塵埃遠。秋晴枕席溫。悠悠迷處所。疑是武陵源。  
嘉興府志。

林衢

衢長樂人。

題廣州光孝寺

開池曾記虞翻苑。列樹今存建德門。無客不觀丞相硯。有人曾悟祖師幡。舊煎訶子泉猶冽。新種菩提葉  
又繁。無柰益州經卷好。千絲絲縷未消痕。藏內法華連華諸經。係益州本。故云。名勝志。

何千里

登金山

上妙空王殿。諸天不敢窺。雲霞捧兜率。日月遶須彌。八柱當如許。三山定自奇。波瀾吞巨海。正要十分詩。

金山志略

馬世珍

游圓通寺

山空不隱響。一葉落還聞。龍去遺荒井。僧歸禮白雲。蟲絲昏畫壁。嵐氣溼爐薰。睡思渾無奈。茶甌易策勛。

嚴州府志

張理

惠山寺

九峯朝暮雲。搖落少游墳。野蔓碑全沒。晴菴磬亦聞。洞偏泉路細。松折鶴巢分。高視太湖近。雲濤鷗起羣。

惠山集

董曼

甘陵寺

晚發山閒寺。籃輿冒朔風。雪融溪漲碧。雲漏日穿紅。歲月塵埃裏。江山醉夢中。人生重鄉井。浪出笑龐公。

撫州府志

劉侃

武夷七曲

峽折峯全削。風回瀑盡飛。山光并水色。載得一船歸。建寧府志。





宋詩紀事卷八十三

錢唐 厲鶚 緝

吳 毛德基 勘定

陶崇

訪僧歸雲菴

閑過選佛場。歸雲翠如潑。入門偶有言。啓頰師便喝。掩耳煨芋爐。但把火深撥。呼童酌玉虹。注之梅檀鉢。噓灰然微紅。橫水煎活茶。酣登甲亭。雙眸爲之豁。鳥啼空山幽。翔集來木末。風月一何佳。團圓共批抹。悠然澹忘歸。于茲得解脫。粵西詩載

朱子恭

昭義驛

霜林紅葉襯梧花。路轉崖根百尺斜。霧日斷雲成徙倚。湘南秋盡未還家。桂林府志

裴迪

題來賢亭

常侍江東第一流。子孫今不泯先猷。築亭意在來賢者。誰慕清風爲少留。

徐鉉別傳鉉世居攝山之陽園池甚盛宅有來賢亭宋裴迪詩云云

黃軫

延慶寺

寶刹標奇處。烟蘿響亂流。地靈僧得住。山好客多遊。燈影連金像。鐘聲散石樓。風雷等閑作。咫尺是龍湫。  
赤城詩集

鄭國華 何志熙

合題昌州牛尾驛

龍尾道中退朝客。雕鞍寶馬黃金勒。誰憐遠使足馳驅。夜半孤村牛尾驛。鄭國華留題。十年去國真悠悠。祇今便可行歸休。平生意氣羞牛後。去踏金鼇頂上遊。  
何志熙續三韻 全蜀藝文志

鄧諫從

題巫山瞻華亭

峻嶒玉削三千丈。翠潑嵐光冷相向。風會太古雲氣長。變化溟濛紛萬象。陰晴一日具四時。天籟擊深虛自響。神仙媚妙擢羣參。錦繡鋪張獻奇狀。蟠根積鐵匯百川。龍矯蛟翻饒跌宕。勢連三楚此開國。故壘荒宮帶溪漲。樓臺井邑老風烟。環佩清聞駐仙仗。竹林風味便讀易。久與江山為輩行。鳴弦餘暇豁心眼。戲著飛闌雲雨上。爽明自可達壑巖。野蔭又多勞草創。政和民氣長似春。景迴心平過于掌。征鴻明滅志何

杳黃鶴追隨意尤放。當年李杜經行處。太史銀鉤刻青嶂。寶刀珠瑟出耕犁。曲水纖腰迷草莽。牢盆古隸雜秦篆。飛動閑摹永平樣。珊瑚交柯迴不蝕。髣髴將軍勛業壯。英雄繁盛隨流水。時有竹枝廣牧唱。孔泉文物起騷經。國色明妃守孤尙。我家蛾眉紫翠閒。爲愛奇峯甘蒟醬。秋風野水憶絲蓴。擊汰夷猶理煙榜。  
四川總志

### 鄧宗度

黃山雜詠十四歲作。

### 桃花峯

劉阮辭世塵。桃花誰復主。無計帶春風。一夜零紅雨。

### 祥符寺

雲水最饒處。輪蹄無到時。夜蟾生佛面。春雪印僧眉。  
黃山志。

### 潘朝英

善濟寺在臨海縣金龜山。

春潮暮落海門山。百艇齊飛牡蠣灘。分得魚蝦歸野市。滿江鷗鷺夕陽閑。  
倦客登臨力已疲。高僧故索小窗詩。江山最好君知否。春去秋來烟雨時。  
台州府志。

### 汪士深

### 昭亭祠

靈祠俯江國。棟宇依層巒。千峯遠岿嶷。二水渺迴環。昭明肅清境。髣髴聞和鑿。藹藹集嘉祉。芬芬奠椒蘭。精神一以展。遐眺憑飛闌。昔賢有高躅。寄墨青雲閒。瓊瑤刻蒼翠。筆勢迴翔鸞。高峯一回首。日落天風寒。  
寧國府志。

霍權

題景呂堂

佞人巧求售。富貴一息頃。千古名不磨。寸心猶耿耿。偉哉正惠孫。疾惡何勇猛。平生歷宦途。南臺與東省。初著獬豸冠。排擊首權倖。姦雄始萌蘖。憤切已骨鯁。一片忠義心。皦皦從簿領。涵養老益壯。大節堅晚景。若人久云亡。冰魂嗟已冷。羨慕徒馳神。反身盍三省。  
寧國府志。

周光嶽

長沙

江上南風起白蘋。長沙城郭異咸秦。故鄉猶自嫌卑溼。何況當時賦鵬人。  
湖廣總志。

樊圃

圃奉化主簿

詠慈氏院杜鵑  
蟠屈如鳳。

山僧取巧蟠珍叢。九苞占盡千葩紅。倚闌精彩欲飛動。百鳥不敢啼春風。  
延祐四明志。

吳致堯

五蓋山

紫蓋修連延。五峯似隨軒。何如惠我民。飛雪遍岡原。郴州文志。

饒南強

禪峯寺

禪山喬木飽蒼烟。柿葉能來老鄭虔。樓閣暮寒風鐵定。與僧翦燭對牀眠。杭州府志。

徐師仁

登瑞巖山

攜筇登絕巘。朝爽薄危闌。乘勝移杯罍。憑高憶羽翰。泉聲穿石響。樹色入秋寒。對酒頻長望。心同渤海寬。

福州府志。

吳宣德

題西巖院

幽村分野徑。勝地絕浮埃。殿閉烟霞靜。門臨水石開。日斜山影背。泉落雨聲來。故里經年別。祇園首重回。

翰墨大全。

孫文叔

絕句

宮柳垂垂拂苑牆。啼鶯驚夢暗心傷。起來羞見空中絮。也得隨風入御牀。廣羣芳譜。

徐蘭臯

流杯池在潭州城北。五代楚王馬希範所鑿。爲上巳宴遊地。

楚王宮闕馬王宮。惟有樓臺帶舊風。屬玉不知人事改。雙雙飛入藕花叢。長沙府志。

吳師正

桃源洞

天台春暖蘭苕馨。海榴吐血黃鳥鳴。風晴雨霽洞天曉。畫屏有路遊人行。劉郎阮郎刻溪客。結伴窮幽絕人跡。洞口遙聞漱玉聲。時有飄英點溪碧。捫蘿涉水前攀緣。瞥見勝景層崖巔。天桃瓊草蔓深谷。飛流傑閣凌青烟。潭上金橋跨龍背。綽約雙鸞飲潭水。初疑帝子別瀟湘。珠佩珊珊來玉趾。瓊姿瑋態躑躅久。熟視人閒未嘗有。羅幔深沈邀客畱。胡麻爲飯椒漿酒。問郎于此何當還。壺中景好非塵寰。客驚遽返覓鄉里。子孫在在皆重元。年華瞬息歎浮世。往事分明如夢寐。相與重尋舊路悲。亂山稠疊烟霞蔽。我來躡屐求遺蹤。松陰坐久曾不逢。野僧相引下山宿。落霞斜日林梢紅。天台山志。

文天祐

天祐九江人。

送人往湖南

雁拖秋月洞庭邊。客路淒涼野菊天。雲隔酒尊橫北海。風吹詩史落西川。夜深鬼火千山雪。春後梅花一樹烟。爲我祝融峯上看。朝曦赤處禮蓬仙。洞庭君山詩集。

黃山聽琴

歲晏抱琴入室處，  
擘絃燒殘聽風雨。  
有客五弦彈太古，  
埽空恩怨不兒女。  
汗樽杯飲擊土鼓，  
如與羲軒相對語。  
又如重華坐舜臯，  
萬物長養不苦窳。  
聞君澹然太古音，  
感君悠悠太古心。  
古意古意誰能識，  
古人古人何處尋。  
黃山志

甄主

閑居

深塢人稀到，  
重門晝亦關。  
白雲秋舍靜，  
明月夜窗閑。  
徑掩花開落，  
簾通燕往還。  
窮居聊自適，  
卻憶謝東山。  
越詠

孫邁

游齊山寺尋陳鴻斷碑

萬木森天繞寺籬，  
一聲孤磬徹江湄。  
樓邊已失陳鴻記，  
亭上猶存杜牧詩。  
細雨乍經巖溜響，  
嫩苔長積石橋危。  
知予好古心常切，  
僧與前山覓斷碑。  
池州府志

張天啓

岳陽樓

天入平湖遠，  
樓深納霽華。  
青山藏福地，  
碧樹記人家。  
水落魚龍蟄，  
風高雁鷺斜。  
古來形勝地，  
何事憶長沙。  
湖廣通志



楊 詢

遊齊山寺

金利岩裏挂斷霓。疊雲沮洳暗窗扉。江風曉定釣人出。山月夜明禪客歸。徑畔芭蕉曾有喻。庭前柏樹本無機。我來重見當時叟。紙帳松房綻衲衣。齊山詩集

朱巖伯

巖伯樂清人。號可以翁。

書延福寺壁

雙瀑飛來古寺西。月蘿烟草久湮迷。自從我輩經行後。便覺他山索價低。老去合爲三徑計。就中聊借一枝棲。石崖大有穿磨所。從與新詩著處題。東甌詩集

王 申

寶林寺

千載寶林寺。清幽每往還。兩潮巖上井。一塔寺中山。門對荒城冷。鄰分古縣閑。道人高處坐。役役笑塵寰。越吟

蕭 磬

桂州

吟拾江邊金翠羽。醉騎海上玉鱗腰。清談試茗遊冰片。至樂觀魚出檻橋。淵鑿類函

張仁

鵝湖春色

平湖漾晴綠，狎鷗自相逐。歸艇小于盂，輕帆曠蒲幅。青萍恣漂流，白魚跳尺玉。柳線牽人衣，香林雨新沐。汀尾沙禽鳴，人家暝脩竹。步履隨春風，席地傾醞醑。玩樂當何如，回首炎威促。栢上遺詩。

蘇莊

寄鶴林辛上人

苦憶長廊清磬音，復懷贊公梅檀林。陽坡佳木鳥相喚，澗戶曉行藤竹陰。日晴山路筍蕨晚，雨足野塘蒲稗深。短褐兀然聊戲劇，滄江鷗鷺本無心。鶴林寺志。

趙曾護

曾護南安主簿

游延福寺

行行出西郊，稍覺囂塵遠。風景既已殊，磽确頗忘倦。南安古雒州，今亦壯哉縣。九日一佳景，居然在郊甸。地高瞰川原，林杪露堂殿。晉朝松百章，存者才一見。歲月不我畱，寒暑幾更變。當年秦隱君，軒冕非所羨。閒關剡溪來，至此獲勝踐。結廬巢其巔，穴石爲之硯。城市不到足，公卿罕窺面。邂逅有至交，相從情繾綣。緬懷興元年，致位在台鉉。扶持公道開，不絕幾如綫。一言才見疏，斥逐遽遭譴。天教流落餘，乃遂山林願。當年築室處，遺址了難辨。獨有高士峯，千載猿鶴怨。南安縣志。

張國衡

水簾洞 在仙居披雲山。

洞口鮫綃薄。山心玉葉浮。殘雲挂疎影。新月下空鉤。白鶴仙人去。荒苔石磴幽。奇蹤看不倦。旬日爲淹留。  
台州府志。

趙清源

天台石梁

何處覓靈蹤。天台第一峯。雲深唯見寺。夜靜忽聞鐘。卓錫隨飛鶴。談元起墊龍。石橋如有約。跨月坐從容。  
天台山志。

王清叔

長淮晚望

目斷長淮渺莽中。孤城突兀倚層空。寒砧幾許遞秋信。漁笛一聲橫晚風。龍吐晴雲嵐氣白。鴉翻落日水天紅。扁舟今夜宿何許。赤壁斷磯蘆葦叢。  
中都志。

陳 睨

游曉覺寺 在長興縣。

肩輿行到竹邊村。竹裏僧房盡閉門。小洞頗聞三里近。殘僧僅有一人存。旋沽薄酒欺寒力。未怯春泥踏雨痕。笑覓梅花伴歸去。斷橋流水月黃昏。  
湖州府志。

唐公佐

三洲巖

峒裏光陰經幾春。峒前蒼木垂千尋。不知空谷當年事。誰識龐眉處士心。殘月照人吞遠徼。晚風吹夢入幽岑。我來須訪神仙宅。好聽雲端環佩音。肇慶府志

陳蹇叔

送新茶李聖喻郎中

頭綱別樣建溪春。小璧蒼龍浪得名。細瀉谷簾珠顆露。打成寒食杏花餠。鷓班碗面雲縈字。兔褐甌心雪作泓。不待清風生兩腋。清風先向舌端生。淵鑑類函

方九功

菊花

露冷江蘋雁度時。蕭蕭黃菊滿疎籬。寒枝帶雨開仍豔。晚節凌霜賞未遲。移傍小簷承綺席。縱觀深夜倒金卮。摘來冉冉香盈把。共泛西風醉莫辭。廣羣芳譜

章 詡

詡昌化人。

靜觀堂在昌化縣覽溪上。

杖策下層巔。來憩雲外莊。簷低繞頽垣。澹泊在一堂。山高戶牖虛。風清長夏涼。翳翳動林影。澌澌浮溪光。

心遠與世隔。獨有文史香。汲井恣嚙漱。蒔藥助體強。園中橘爲奴。沼內芟可裳。蒼官青不老。籬下明秋芳。陶情在庶物。養性歸琴觴。矯首起遐觀。是中有濠梁。杭州府志。

趙仲藏

福勝院

千騎踏清霜。東游古道場。雲籠山骨秀。風引水聲長。曉日依稀暖。寒花取次香。後隨吹管急。空谷蒼宮商。杭州府志。

汪起莘

黃山歌

黃山高哉。巋然爲江東之巨鎮兮。壁立于兩浙之上游。摩天戛日以直上。陽支陰派盤數州。四海不知雨根本。行人但見雲飛浮。嘗試芒屨竹杖造乎其閒兮。一溪桃杏紅爛漫。萬壑松柏寒颼颼。懸崖絕磴可望不可到。古木倒挂險更逾。上有靈泉千萬道。如銀河爭瀉而競注兮。礮雷濺雪隱見穿林幽。中有青鸞黃鶴千萬對。雄倡雌和迭舞而交鳴兮。深林自適。復有數點白雪之猿猴。山中自昔無歷日。花開葉落成春秋。殘陰脫穎。不知其所從來兮。但見夫澗谷之閒。桃花如笠。松花如纛。竹葉如扇。蓮葉如舟。菖蒲九節。白鹿靈芝。三秀眠青牛。人閒三月春已暮。洞中花卉春長留。奇香異氣逐風去。散落塵世誰能酬。黃山高哉。雲際一峯尙可畫。雲外一峯畫不得。霜繒鋪了掉首休。丹砂一峯燭天爭。日月九龍一峯拔地張旗旒。天都一峯傑出于三十六峯兮。星斗森羅挂珠殿。日月對展搖瓊樓。中有一人兮。龍冠而鳳裘。左容成兮。

石浮丘。我時收卻釣竿樵。具作一束投諸曹院溪中流。浴余身兮湯泉。風余袂兮帶所搜。三字疑誰。鼓隱隱  
兮管啾啾。水晶盤兮白玉甌。帝酌我兮勞我。左右爲余兮凝眸。指余以南峯石壁記。授余以紅鉛黑汞大  
丹頭。黃山高哉。余將攬秀巢雲鍊氣于其下。坐令萬物不生疵癘兮。禾黍盈疇。黃山志。

趙璩

送張達道還茅山

賸借紅塵一日閑。有勞妙語徹幽關。豈知隱几如南郭也。媿移文向北山。有意清風憐我住。無心孤月伴  
君還。三茅若問今消息。爲報道遙大地閒。茅山志。

程炎

炎涇縣隱士有烟水集

和趙守獨遊水西寺

吟月歌風酒力微。獨尋幽壑叩禪扉。泊隄小艇迎人渡。入水閑雲伴鶴飛。梅落半含冰雪思。石寒長覆薜  
蘿衣。水西景物還如舊。恨不相從倒載歸。寧國府志。

朱升之

相湖在仙居縣。

世路羊腸淹客遊。塵纓來此濯清流。半窗修竹翠含雨。一片澄湖冷浸秋。地僻莓苔侵石几。機忘鷗鷺近  
漁舟。夜涼酒醒未能睡。詩句欲成搔白頭。台州府志。

范良龔

良龔、吳門人。

妙庭觀 在富陽縣相傳爲董雙成故宅山下多董姓天聖中道士鑿地得丹鼎銅槃

我昔遨游周八極。玉京金闕俱經歷。翩然騎鳳下瑤池。始與雙成獲相識。雙成侍宴王母傍。道貌方瞳照人碧。玉笙吹徹奉瓊觴。范子從傍丐餘瀝。東方曼倩謂余言。汝亦名存地仙籍。鳳城南望好溪山。此是元君故仙宅。琉璃槃上存金鼎。鼎內丹砂如琥珀。汝能服食早歸來。與予同是逍遙客。我時貪醉蟠桃春。不記當年說仙蹟。一朝酒醒人世非。盤碎丹飛杳難覓。香風堂上久徘徊。蘇李題詩挂空壁。自注觀有太白東坡詩孤雲野鶴謾興怨。我獨摩挲問金狄。世人勸我舐丹鼎。我亦何嘗苦營役。丈夫自有大還丹。得道不分今與昔。杭州府志

呂紘

黃犢嶺 在臨平山唐隱士丘丹遺迹

疇昔聞高隱。紅塵隔遠林。閑乘黃犢出。踏破白雲深。杭州府志

蔡中道

張公洞

天上驟蹤竟不迴。洞門深閉密封苔。神光夜燭燒丹竈。淑氣晴薰講易臺。碧草春肥仙去遠。紫芝雲暖鶴歸來。清游喜挾三茅客。杖履凌空霧雨開。宋藝圃集

黃彥輝

古寺

古寺雲深去路賒。來分僧鉢共生涯。依稀池草成春夢。容易江梅老歲華。長鍊悲彈三尺雪。短檠寒落五更花。夜來風雨催歸急。爲報河陽令尹家。宋藝圃集

楊養晦

寒雲千疊山

在新昌縣南三十里

松竹陰森護上方。老仙蓬髮一簪霜。客來欹枕松風裏。歸夢不知山水長。越詠

劉說道

宿武夷觀

度溪造靈境。臺殿隱山曲。虛堂留白雲。今夕得同宿。扁舟計已具。清曉泛春綠。

玉女峯

嘉名實世想。奇態明天造。亭亭照綠水。獨立爲誰好。日日看遊人。遊人還自老。以上建寧府志





宋詩紀事卷八十四

錢唐厲鶚緝  
錢唐汪峒勛定

花藥夫人

夫人姓徐氏蜀之青城人以才色入蜀宮後主嬖之號花藥夫人效王建作宮詞百首國亡入宋備後宮

鐵圍山叢談國朝降下西蜀而花藥夫人又隨昶歸中國昶至且十日則召花藥夫人入宮中而昶遂死昌陵後亦感之常造毒藥爲患不能禁太宗在晉邸時數數諫昌陵而不克去一日兄弟相與獵苑中花藥夫人在側晉邸方調弓矢引滿政擬走獸忽回射花藥夫人一箭而死焉

能改齋漫錄徐匡璋納女子孟昶拜貴妃別號花藥夫人意花不足擬其色似花藥翻輕也又升號慧妃號如其性也王師下蜀太祖聞其名命別護送陳無已云姓費誤矣

奉召作

君王城上豎降旗妾在深宮那得知十四萬人齊解甲更無一箇是男兒

後山詩話僞蜀降太祖召花藥夫人使陳詩誦其國亡詩云太祖悅蓋蜀兵十四萬而王師數萬耳

宮詞

五雲樓閣鳳城閒。花木長新日月閑。三十六宮連內苑。太平天子住崑山。  
龍池九曲遠相通。楊柳絲牽兩岸風。長似江南好風景。畫船來去碧波中。  
殿名新立號重光。疊上亭臺盡改張。但是一人行幸處。黃金閣子鎖牙牀。  
廚船進食蒨時新。侍宴無非是近臣。日午殿頭宣索鱠。隔花催喚打魚人。  
御製新翻曲子成。六宮纔唱未知名。盡將鸞篋來抄譜。先按君王玉笛聲。  
太虛高閣凌虛殿。背倚城牆面枕池。諸院各分娘子位。羊車到處不教知。  
殿前宮女總纖腰。初學乘騎怯又嬌。上得馬來才似走。幾回拋鞚把鞍橋。  
自教宮娥學打毬。玉鞍初跨柳腰柔。上棚知是官家認。徧徧長羸第一籌。  
內家追逐採蓮時。驚起沙鷗兩岸飛。蘭棹把來齊拍水。並船相鬪溼羅衣。  
月頭支給買花錢。滿殿宮人近數千。遇著唱名多不語。含羞走過御牀前。  
水車踏水上宮城。寢殿簷頭滴滴鳴。助得聖人高枕興。夜深長作遠灘聲。  
沈香亭子傍池斜。夏日巡遊歇翠華。簾畔越盆盛淨水。內人手裏剖銀瓜。  
薄羅衫子透肌膚。夏日初長板閣虛。獨自倚欄無一事。水風涼處讀文書。  
六宮一例羅冠子。新樣交鐫白玉花。欲試淡妝兼道服。面前宣與唾盂家。  
春天睡起曉妝成。隨侍君王觸處行。畫得自家梳洗樣。相憑女伴把來呈。

小小宮娥到內園。未梳雲鬢臉如蓮。自從配與夫人後。不使尋花亂入船。  
春日龍池小宴開。岸邊亭子號流杯。沈檀刻作神仙女。對捧金樽水上來。  
擣菹冷澹學投壺。箭倚腰身約畫圖。盡對君王稱妙手。一人來謝一人輸。  
明朝臘日官家出。隨駕先須點內人。回鶻衣裝回鶻馬。就中偏稱小腰身。  
高燒紅燭照銀燈。秋晚花池景色澄。今夜聖人新殿宿。後宮相競覓祇承。  
池心小樣釣漁船。入甌偏宜向晚天。挂得綵帆教便放。急風吹過水門邊。  
會仙觀內玉清壇。新點宮人作女冠。每度駕來羞不出。羽衣初著怕人看。  
小院珠簾著地垂。院中排比不相知。羨他鸚鵡能言語。窗裏偷教鸚鵡兒。  
內人承寵賜新房。紅紙泥窗透畫廊。種得海柑才結子。乞求自過與君王。  
梨園弟子簇池頭。小樂攜來候宴游。旋炙紅笙先按拍。海棠花下合梁州。  
秋曉紅妝傍水行。競將衣袖撲蜻蜓。回頭瞥見宮中喚。幾度藏身入畫屏。  
內人深夜學迷藏。徧遶花叢水岸傍。乘興或來仙洞裏。大家尋覓一時忙。  
管弦聲急滿龍池。宮女藏鉤夜宴時。好是聖人親捉得。便將濃墨掃雙眉。  
安排諸院接行廊。外檻周回十里強。青錦地衣紅繡毯。盡鋪龍腦鬱金香。  
年初十五最風流。新賜雲鬟使上頭。按罷霓裳歸院裏。畫樓雲閣總重修。

花廳夫人宮詞。

成都文類王平甫云熙寧開奉詔定蜀楚秦氏三家所獻書得一弊紙所書花藥夫人詩共三十二首乃夫人親筆而詞甚奇謹令繕寫入三館而歸口誦數篇于丞相安石明日中書語及之而王珪馮京願傳其本于是盛行于世

張夫人

哭魏夫人

香散簾幃寂塵生翰墨閑空傳三壺譽無復內朝班

揮塵後錄曾文肅熙寧初爲海州懷仁令有監酒使臣張者小女甫六七歲甚爲惠黠文肅之室魏夫人憐之教以誦詩書頗通解其後南北睽隔紹聖初文肅柄事樞密時張氏女已入禁中雖無名位以善筆札掌命令之出入忽與夫人相聞夫人以夫貴疏封瀛國稱壽禁庭始相見敘舊自後歲時遣問夫人歿張作詩哭之云云從此絕迹矣後四十年靖康之變張從昭慈聖獻南渡至錢唐朱忠靖筆錄所記昭慈遺其傳導反正之議張夫人者即其人也年八十餘終

楊妹子

楊妹子恭聖皇后之妹

書史會要楊妹子書法極似寧宗馬遠畫多其所題語關情思人或譏之

題趙伯驢畫

蓮開宮沼年年盛香染斑衣葉葉新願借琴音奏清雅薰風涼殿壽雙親

題菊花圖

莫惜朝衣漣酒錢。淵明身卽此花仙。重陽滿滿杯中泛。一縷黃金是一年。以上兩詞類

題馬遠畫梅

重重疊疊染細黃。此際春光已半芳。開處不禁風日煖。亂飄晴雪點衣裳。白玉蛙梅。銖衣翠蓋暎朱顏。未忝何年入帝關。默被畫工傳寫得。至今猶似在衡山。著雪紅梅。天桃豔杏豈相同。紅潤姿容冷淡中。披拂輕烟何所似。動人春色碧紗籠。烟鎖紅梅。渾如冷蝶宿花房。擁抱檀心憶舊香。開到寒梢尤可愛。此般必是漢宮妝。綠萼玉蛙。

項鼎鉉呼恒日記鑑臺叔出觀馬遠單條四幅俱楊妹子題後各有楊娃之章一小方印。

王清惠

清惠字冲華。宋昭儀。德祐丙子。隨三宮入燕。日霧按東園客談有昭儀王清惠賦滿江紅詞。楊儀金姬別傳作黃

惠清當是傳聞之誤。

送水雲歸吳并序

水雲畱金臺一紀。琴書相與無虛日。秋風天際。東書告行。此懷愴然。定知夜夢先過黃河也。一時同人以勸君更盡一杯酒。西出陽關無故人。分韻賦詩為贈。他時海上相逢。當各說神仙人語。又豈以世間聲律為拘拘耶。

朔風獵獵割人面。萬里歸人淚如霰。江南江北路茫茫。粟酒千鍾為君勸。水雲集。

李陵臺和汪水雲韻

李陵臺上望蒼子五言詩。客路八千里。鄉心十二時。孟勞欣已稅。區脫未相離。忽報江南使。新來貢荔枝。

擣衣詩呈水雲

妾命薄如葉。流離萬里行。黃塵燕塞外。愁聽擣衣聲。

秋夜寄水月水雲二昆玉

萬里倦行役。秋來瘦幾分。因看河北月。忽憶海東雲。以上楊儀金姬別傳。

陳真淑

送水雲歸吳

天山雪子落紛紛。醉擁貂裘坐夜分。明日馬頭南地去。琴邊應是有文君。

黃慧眞

同前

高疊燕山冰雪勁。萬里長安風雨橫。君衣雲錦勒花驄。此酒一杯何日更。

何鳳儀

同前

十年燕客身如病。一曲剡溪心不競。憑君寄與愛梅仙。天理現時人事盡。

周靜眞

同前

燕山雪花大如席。馬上吟詩無紙筆。他時若遇隴頭人。折寄梅枝須一一。  
葉靜慧

同前

塞上砧聲響似雷。憐君騎馬向南回。今宵且向穹廬醉。後夜相想無此杯。

孔清真

同前

瘦馬長吟塞驢吼。坐聽三軍擊刁斗。歸人鞍馬不須忙。爲我更釀葡萄酒。

鄭惠真

同前

琵琶撥盡昭君泣。蘆葉吹殘蔡琰啼。歸見林逋煩說似。唐僧三藏入天西。

方妙靜

同前

萬里秦城風淅淅。一望蘇州雲幕幕。君今得旨歸故鄉。反鎖衡門勿輕出。

翁懿淑

同前



金門夜醉紫霞觴，乞得黃冠還故鄉。一似陳搏歸華嶽，又如李泌過衡陽。

章妙懿

同前

一從騎馬逐鈴鑾，過了千山又萬山。君已歸裝向南去，不堪腸斷唱陽關。

蔣懿順

同前

十年牢落醉穹廡，不用歸榮駟馬車。他日儻思人在北，音書還寄雁來無。

林順德

同前

歸舟夜泊西興渡，坐看潮來又潮去。江草江花春復春，山青水綠元如故。

袁正淑

同前

抱琴歸去海東濱，莫逐成連覓子春。十里西湖明月在，孤山尋訪種梅人。以上水雲集。

朱氏

袖中遺詩

既不辱國，幸免辱身。世食宋祿，羞爲北臣。妾輩之死，守于一貞。忠臣孝子，期以自新。

西湖志餘。至元十一年丙子二月。伯顏以宋謝全兩后以下北去。五月二日抵上都。朝見十二日夜。宋宮人陳氏朱氏與二小姬沐浴整衣焚香縊死。朱氏遺四言詩于袖中。



宋詩紀事卷八十五

錢唐厲鶚緝

海寧許承祖勘定

令時

令時字德麟太祖次子燕王德昭元孫元祐中簽書潁州公事坐與蘇軾交通罰金入黨籍紹興初襲封安定郡王同知行在大宗正事薨贈開府儀同三司有侯鯖錄

王直方詩話東坡作秋陽賦云趙王之孫有賢公子宅于不土之里而詠無言之詩蓋時字也坡云且教人別處使不得

錦繡萬花谷趙氏玉牒派藝祖下德字惟字從字世字令字子字伯字師字希字與字孟字由字太宗下元字允字宗字仲字士字不字善字汝字崇字必字良字友字魏王廷美下德字承字克字叔字之字公字彥字夫字時字若字嗣字次字

同官李仲益贈張思仲家歌人團茶予題其封

色映宮姝粉香傳漢殿春團團明月魄卻贈月中人

次教授陳復常韻

坎壞中年坐廢人老來貂鼎視埃塵鐵霜帶面唯憂國機穽當前不為身發廩已康諸縣命蠲逋一洗幾年貧歸來又掃寬民奏慙媿毫端爾許春

初到長安

來往長安未定居，暫將僧舍當吾廬。空中說法憑鈴語，枕上朝飢聽木魚。因果分明休問佛，行藏自信罷占書。眼前一物真堪羨，百尺長楊水滿渠。以上侯鯖錄。

跋太白醉草 六言

雖自九天分派，不與萬李同林。步處雷驚電繞，空餘翰墨窺尋。

春渚紀聞云：此德麟跋。

遠所藏，其實自謂也。

冬日居山

亂山深處過嚴凝，僻靜門鄰物外僧。送客踏穿松徑雪，煮茶敲破石池冰。朝垂簾幙寒慵卷，夜鎖樓臺靜懶登。只待春來歸上國，杖藜吟出白雲層。詩林萬選。

句

我識之無常縮舌，君能競病且低顏。和劉景文。侯鯖錄。

令 鑠

令鑠，字伯堅，太祖五世孫，第進士，官至太僕。

子瞻和予致齋詩，有端向甕間尋吏部，老來唯欲醉爲鄉之句。因送薄酒，兼成斐章，冀發笑也。古人醉以酒，蓋亦有所寓，一飲百憂忘。陶陶朝復暮，公欲醉爲鄉。甕間尋吏部，惜取青銅錢。濁醪安足酤。

敢竊好事名。聊資子雲具。巧手斧鼻端。此情知有素。

子瞻辭免起居之命。令鑠復用前韻一首以勉之。

登州與儀曹到官如旅寓。螭陛鳳凰池。翱翔未云暮。冰雪照人清。黃色盈中部。譬如千日釀。一宿陋清醕。載筆無多時。公眞濟時具。歎息賀德基。猶知我尸素。

鐵網珊瑚。鮮于伯機游高亭山廣嚴院記云。院僧出東坡趙令鑠唱和真迹。王明清題云。英宗潛龍日。居穆清宅。與宗屬淄菴憲王游從最厚。慶歷八年戊子。兩家各生子。同年月日時。其後英宗入繼大統。所誕卽神宗。旣卽天位。以是日爲同天節。恭憲所育。乃太僕伯堅也。爲本朝登進士第之冠。易文階最先。子孫蕃衍。世科相望。聲華焜耀。以至于今。五行之說。其不可信哉。僧云。伯堅子孫。今居臨平。貧不能自振。此卷近年以粟易之。

令衿

令衿太祖五世孫。號超然居士。官左朝散大夫。主管台州崇道觀。

李伯紀丞相挽詩

道大終爲累。功高反被疑。恨無長日月。寶此大蒼龜。鼓咽空山暮。風酸落木悲。弔喪哀不及。賴有哭公詩。  
梁溪集附。

子覺

子覺字彥先。號雪齋。太祖六世孫。令衿之子。爲嚴倅時。放翁爲郡守。誠齋以詩寄放翁。有幕中何幸有詩人之句。謂子覺也。有雪齋集。

賈誼野錄近世書墨法蓋推晉鄉雪齋趙彥先子覺彥先乃故安定郡王超然居士令矜表之子也其墨法本無師承但自少時篤好製造招延良工參合衆技遂造其妙中興三廟咸見貴重名播遐邇

墨史宗室趙令矜善製墨子子覺孫伯

康皆傳其膠法銘曰超然清芬如在

書懷

柳影槐陰綠遠廳日長細得話詩情迎風紫燕忽雙去隔雨黃鸝又一聲筆墨生涯成冷淡笏疏盤饌易經營世閒微利真刀蜜有底驅馳取重輕瀛奎律髓

子櫟

子櫟字夢授太祖六世孫元祐六年進士紹興中至寶文閣直學士卒

句

夜棋三百子曉髮一千梳髮爲干戈白心于社稷丹雞肋編

伯琳

伯琳太祖七世孫官右選

句

爲嫌陶令醉來伴屈原醒

趙與麟娛書堂詩話子曾伯祖伯琳官至右

選平生喜爲詩五月菊句云云人所傳誦

伯晟

伯晟、太祖七世孫、淳熙中上元令。

游攝山棲霞寺

棲霞境界何清壯，巖立五峯如列障。三徵不復見高人，千刻尙能瞻寶相。摩空老木韻秋聲，雲屋天巖滿意行。夜闌風定月將午，門外呦呦聞鹿聲。景定建康志

師翼

師翼、字從善、太祖八世孫、伯驢子、舉進士、累遷司農卿、知臨安府、進兵部尚書、與祠卒、自號無著居士、又號東牆。

瓊花

香得坤靈秀氣全，綵珠團外蜨翩翩。親曾后土祠前看，不是人閒聚八仙。全芳備祖

師俠

師俠、號坦菴、太祖八世孫。

梅花

南山如佳人，迥立不可親。而況得道者，其閒梅子真。全芳備祖

師恕

師恕、太祖八世孫。



月巖

瞻此巖壑勝。領客共登臨。危棧臨不測。巘途歷嶽嶽。俯仰極高低。上下窮幽深。來登空明山。千崖正沈沈。下瞰青羅江。古木鬱蕭森。清風萬里來。層雲盪孤襟。有客可共賦。有酒可自斟。此景豈易得。此樂豈易尋。吾生今老矣。遁迹歸窮岑。一櫂下瀟湘。此別意難任。別後無相忘。詩成寄郵音。粵西詩載

師秀

師秀字紫芝號靈秀永嘉人太祖八世孫紹熙庚戌進士浮沈州縣改秩而卒有天樂堂集清苑齋集四靈之四

詩人玉屑天樂冷泉夜坐詩云樓鐘晴更響池水夜如深後改更爲聽改如爲觀病起詩云朝客偶知承送藥野僧相保爲持經後改承作親改爲作密二聯改此四字精神頓異真如光弼入子儀軍矣

梅磻詩話杜小山問句法子趙紫芝荅曰但能飽喫梅花數斗胸次玲瓏自能作詩戴石屏云雖一時戲語亦可傳也

靈隱寺

衆境碧沈沈前峯月正臨樓鐘晴聽響池水夜觀深清淨非人世虛無見佛心卻尋來處宿風起古松林

絕句

數日秋風欺病夫盡吹黃葉下庭蕪林疎放得遙山出又被雲遮一半無

姑蘇臺作

何人可與話登臨。徙倚危闌日向沈。千古蒼茫青史夢。一年迢遞故鄉心。天無雨雪梅花旱。地有波濤雁影深。爲是夫差舊臺榭。愁來不敢越人吟。

絕句

黃梅時節家家雨。青草池塘處處蛙。約客不來過夜半。閑敲棋子落燈花。

柳溪詩話意  
雖腐而語新

薛師石瓜廬

不作封侯念。悠然遠世紛。唯應種瓜日。猶被讀書分。野水多於地。春山半是雲。吾生嫌已老。學圃不如君。

巖居僧

開扉坐石層。終日少人登。一鳥過寒木。幾花搖翠藤。茗煎冰下水。香炷佛前燈。吾亦逃名者。何因似此僧。

孤山寒食

三月芳菲在水邊。旅人消困亦隨緣。晴舒蝶羽初勻粉。雨壓楊花未放綿。有句自題閑處壁。無錢難買貴時船。最憐隱者高眠地。日月春風是管弦。

雁山寶冠寺

行向石闌立。清寒不可云。流來橋下水。疑是洞中雲。欲住逢年盡。因吟過夜分。蕩陰無絕頂。一雁不曾聞。

呈蔣肖韓薛師石

中夜清寒入縵袍。一杯山茗當香醪。禽翻竹葉霜初下。人立梅花月正高。無欲自然心似水。有營何止事如毛。春來擬約蕭閑伴。同上天台看海濤。以上清苑齋集。

句

柘空淮繭白。梅近楚秧青。送謝耘游淮。娛書堂詩話。

希逢

希逢太祖九世孫。

九日舟中

倦客逢黃節。生涯寄葉舟。窮途危不顧。飛櫂去難留。舊菊重陽日。寒蘆兩岸秋。多情唯破帽。猶戀老人頭。後村千家詩。

希淦

希淦號定山。太祖九世孫。

半山寺有感

一水波澄接御溝。近城宮柳弄春柔。烏衣巷裏人何在。白鷺洲前水自流。千古風流歌舞地。六朝興廢帝王州。今番不負看山約。他日重來說舊游。詩林萬選。

希櫛

希櫛字誼父。汴人。太祖九世孫。有抱拙小藁。

江湖偉觀

華屋巋然占上方。一樽同此寄相羊。江湖翻海暮天闊。湖水拍隄春草長。莽莽越山凝紫翠。搖搖蘇柳聞青黃。歸鴻影裏闌干晚。回首中州入渺茫。

送李鶴田東游後還鄉

劍傍梅花鶴夢醒。東游吟骨帶秋清。台山路杳神仙迹。楚國書來母子情。半榻烟霞應有約。一筇風雪且兼程。丁寧及早催行李。莫待西湖草色平。

過臨平

市井蕭條景物非。居人猶號永和隄。春山十里斜陽樹。漠漠殘紅杜宇啼。以上抱拙小集。

臨平記。宋理宗紹定三年冬十月。築永和塘捍臨平湖。許應和有記。

希邁

希邁字端行。號西里。永嘉人。太祖九世孫。有西里詩藁。

酬陳校書見寄

日長松院靜。孤坐對殘編。雨久波平岸。山高燒接天。春醒茶可解。酒病藥難痊。獨喜君親政。南中客共傳。  
前賢小集拾遺。

琴泉精舍寄友

客來僧已去。古屋靜蕭蕭。敲石引松火。對花懸酒瓢。窗櫺寒背日。柱礎潤通潮。君冑過幽寂。水程終隔橋。

王生山水歌

范寬山頭李成樹。百年二老皆仙去。如今尺素畱人閒。縱有千金無博處。後人筆底工一家。聲價隨可喧。中華王君二妙聚一手。參以吟思游天涯。萬里江山幾數幅。東抹西塗意先足。蒼梢巨石相參差。風雨烟雲在羈束。近時目賤耳反眞。畫圖重舊不重新。名家翰墨未必貴。塵漬贖本翻爲眞。君提健筆來海外。山若玉簪江若帶。朝昏變態焉可窮。筆未鋪張心已會。嶺南游者多詩人。見君作畫應憐君。求我新詩寫君畫。終使李范聲名分。以上東甌詩集。

希彭一作滂

希彭字清中。號十洲。太祖九世孫。四明人。寶慶二年進士。

隨隱漫錄。趙君入仕四十年。虛靜恬淡。寂寞無爲。除南雄守。不赴。後別親友。理家事。端坐而逝。遺偈云。六十二年皮袋。放下了無罣礙。青天明月一輪。萬古逍遙自在。

絕句

手執黃庭上石臺。竹陰掃月徧蒼苔。欲從此處卽仙去。玉立清風待鶴來。隨隱漫錄。

希混

希混。太祖九世孫。

岑公洞

自有烟雲護石扉。更闌曉色近清暉。崑前老檜吟風處。似請仙翁化鶴歸。

名勝志。夔州峯公洞在大江之南。廣六十餘丈。深四十餘丈。石崑盤結。若華蓋。左右方池。有泉涌出。崑際。遇盛夏。注水如簾。真神仙窟也。圖經云。峯公名道願。江陵人。隋末。避地隱此。百餘歲。肌膚若冰雪。積二十年。尸解去。至唐宋間。加以神妙。大師虛鑿。真人之號。唐刺史馬冉詩。南溪有仙澗。咫尺非人間。冷泠松下風。日暮空蒼山。趙希混有詩。

與

檳

與檳太祖十世孫。

題白鶴崑

六丁開兩壁。不知始何年。中間一空洞。可張幾客筵。我來拂石坐。傾耳聽潺湲。古榕蔽天罅。飛瀑穿峽懸。四時宿雨露。亭午斂虹烟。昔人避山寇。飲溜枕苔眠。興懷內訂日。鼎鼎百餘年。

名勝志。福寧縣西南白鶴崑。石磴峻。盤空而上。海上諸山。皆入延眺。嶺之南。飛泉百丈。遙望如銀河倒瀉。是名南山濠。宋趙與檳有詩。

與  
崑

與崑字中父。號菊坡。秀安僖王四世孫。居湖州。寶祐初。知平江府。孟頫其子也。

宿半塘寺

夜宿半塘寺。惟聞塔上鈴。老僧行道影。童子誦經聲。竹密風猶勁。窗幽月愈明。瓦爐香斷處。一榻灑然清。

吳興藝文補

與 饒

與饒字德淵號節齋太祖十世孫居湖州嘉定十三年進士理宗朝歷官吏部尙書兼知臨安府終淮浙發運使知平江府致仕

太湖

倦客滄浪意扁舟汗漫游雲歸林屋晚木落洞庭秋此地真堪老中原恨未休可知侯萬戶不似橘千頭

全芳備祖

與 杼

與杼號見山太祖十世孫

游大滌

九鎖闔仙關長歌入翠巒青松飛羽蓋脩竹動琅玕雪霽千巖瘦雲深六洞寒客來塵慮息一笑倚闌干

洞霄詩集

與 滂

與滂字肖范號蔗境四明人太祖十世孫淳祐中爲閩安鎮官

登浙江樓

兩岸共明月闌干霄漢閒風波浙江水砥柱海門山晝夜潮消長利名人往還不如沙上鷺玉立一身閑

花院

拆了千秋院宇空。無人楊柳自春風。薔薇性野難拘束。卻過鄰家屋上紅。以上詩林萬選。

牽牛花

西風樵子谷。藤蔓絡柴關。名在星河上。花開曉露閒。秋空同碧色。曉日轉紅顏。若挂青松頂。翛然不可攀。  
全芳備祖。

與東

與東字賓陽。嚴陵人。太祖十世孫。宗學上舍。寶祐丙辰進士。歷任贛州教。兩浙運。幹會子庫檢察司。農寺排岸班。改奉議。有魯齋小橐。

方萬里序。君詩瘦而不枯。勁而不燥。如趙章泉評君詩。以爲唐唯一孟東野。宋唯一陳無已。然後知君之志。慕貞曜後山之爲人。甘于匱窮靜退而無求者也。

次韻方萬里雨夜雪意

芋火房陰處。翛然類嬾殘。雨欺梅影瘦。風助竹聲寒。擁袂衣全薄。哦詩字欲安。兒童疑有雪。頻起穴窗看。

次韻方萬里寒甚送酒

連日寒殊甚。衰年無一能。硯呵磨墨凍。瓶曬插花冰。浮世無根絮。餘生有髮僧。蘇門如可卽。端合事孫登。  
以上瀛奎律髓。

孟堅



孟堅字子固號彝齋太祖十一世孫其先以安定郡王從高宗南渡家于嘉禾之廣陳寶慶二年進士歷官朝散大夫嚴州守景定初遷翰林學士宋亡不仕

齊東野語子固襟度蕭爽有六朝諸賢風氣時比之米南宮而子固亦自以爲不歎也酷嗜法書多藏三代以來金石名迹東西薄游必挾所有以自隨一舟橫陳僅留一席爲偃息之地隨意左右取之撫摩吟諷至忘寢食所至識不識望之知爲米家書畫船也偶客輦下會菴蒲節余借一時好事者邀子固各攜所藏買舟湖上相與評賞飲酣子固脫帽以酒啼髮箕踞歌離騷旁若無人薄莫入西泠掠孤山檣櫂茂樹間指林麓最幽處瞪目絕叫曰此真洪谷子董北苑得意筆也鄰舟數十皆驚駭絕歎以爲真謫仙人

姚桐壽樂郊私語子固入本朝不樂仕進隱居州之廣陳鎮時載一小舟泊蓼汀葦岸看夕陽賦曉月爲事縣令宣城梅黻到船訪公公飛權而去梅曰昔人所謂名可聞而身不可見殆謂先生歟公從弟子昂自荅中來訪公閉門不納夫人勸之始令從後門入坐定第問弁山笠澤近來佳否子昂云佳公曰弟奈山澤佳何子昂退使人灑其坐具

里中康節菴畫墨梅求詩因述本末以示之

逃禪祖花光得其韻度之清麗閑菴紹逃禪得其蕭散之布置回視玉面而鼠鬚已見工夫較精緻枝枝例作鹿角曲生意由來端若爾所傳正統諒末節舍此的傳皆僞耳僧定花工枝則龜夢良意到工則未女中卻有鮑夫人能守師繩不輕墜可憐聞名不識面云有江西畢公濟季衡龜醜惡拙祖弊到雪篷觴

濫矣。所恨二王無臣法。多少東鄰擬西子。是中有趣豈不傳。要以眼力求其旨。踢鬚止七莖。則三點眼名。椒梢鼠尾。枝分三疊墨。濃澹花有正。背多般葉。夫君固已悟。空蹄重說偈。言吾亦贅。誰家屏障得君畫。更以吾詩跋其底。

康不領此詩。又有許梅谷者仍求。又賦長律。

濃寫花枝淡寫梢。鱗皴老幹墨微焦。筆分三踢攢成瓣。珠暈一圓工點椒。糝綴蜂鬚凝笑靨。穩拖鼠尾施長條。盡吹心側風初急。猶把枝埋雪半銷。松竹襯時明掩映。水波浮處見飄飄。黃昏時候朦朧月。深淺谿山長短橋。鬧裏相挨如有意。靜中背立見無聊。筆端的皜明非畫。軸上縱橫不是描。頓覺坐來春盎盎。因思行過雨瀟瀟。從頭總是楊湯法。拚下工夫豈一朝。

王翠巖寫竹求詩亦與。

古畫畫物無定形。隨物賦形皆迫真。其次師述有師繩。如印印泥隨前人。尙疑屋下重作屋。參以新意乃足。晉魏而來幾百年。義獻斷弦誰解續。何況高東李杜編。江湖競買新詩讀。願君種取涓川一千畝。飽飯逍遙步捫腹。風晴烟雨盡入君心。智吐出毫端自森肅。員大夫來子章何碌碌。

竹墨蘭圖仍賦

六月衡湘暑氣蒸。幽香一噴冰人清。曾將移入浙西種。一歲纔花一兩莖。

自題水仙圖

自欣分得儲山邑。地近錢清易買花。堆案文書雖鞅掌。簪餅金玉且奢華。酒邊已愛香風度。燭下猶憐舞

影斜。鑿弟梅兄來次第。撓春熱鬧令君家。以上鐵網珊瑚。

法忍寺門夜泊

秋泊禪扉夜。清吟入興頻。風生水鱗甲。雲放月精神。小夢迷香樹。新涼透葛巾。舊題尋不見。吹徧壁間塵。  
栢上遺詩。

孟 淳

孟淳字子真。號竹所。又號虛閑野叟。子固之弟。

題高房山夜山圖二首

月底江山如畫好。樓中几席與秋清。剡藤不到高人手。一段風流可得成。  
江行山立月盤桓。有客無言樓上看。清興官隨城漏盡。夜深風露恐高寒。鐵網珊瑚。

士 揆

士揆字才孺。太宗五世孫。官直祕閣。

登天清閣

夕陽低盡已西紅。百尺樓高萬里風。白髮年年何處得。只應多在倚闌中。墨莊漫錄。  
不 敏

不敏。太宗六世孫。官保義郎。

寄蘇盼奴事載蘇小娟詩。

當時名妓鎮東吳，不好黃金只好書。借問錢塘蘇小小，風流還似大蘇無。武林紀事

不謫

不謫字師厚，太宗六世孫。慶元中，昭武假守。

句

信史除青簡，封章窒皂囊。

揮塵餘話：王仲言學問該博，遂初尤丈欲收實史館，不果。仲

言又嘗剗切上封事，不謫因不自揆，以拙句殿諸公後云。

善應

善應字彥遠，太宗七世孫。汝愚父，寓居崇德洲錢市。

題寧師西閣

飄泊南來幾歲寒，追談往事漫心酸。雲烟幕隔中原望，歸折梅花忍淚看。

次韻李長卿

一別芳洲不計年，舊時攀折柳依然。故人似欲撩詩興，賸折梅花向酒邊。至元嘉禾志

善贛

善贛，太宗七世孫。

題岑公洞

真人邈何之。恍惚不可見。洞居獨嵌空。壁留明珠濺。藤蘿含冥濛。竹柏鬪蔥蒨。至幽合人心。遠翠落江面。野老乘籃輿。使君肆清燕。日影砌下倒。雲容坐閒變。大木巖欲傾。邃壑路微轉。崢嶸施屏風。點綴成彩綉。雖云急行樂。勝賞殆亦徧。欲歸重盤旋。拂石看古篆。名勝志

善堅

善堅字德固袁州人太宗七世孫乾道二年進士判婺州官至戶部尚書

化成巖

低帽白蕉衫跨馬北巖路爲我撤炎歊時有清風度杖策躡游屐捫蘿窮幽趣怪石鳴瘦筇狹徑窳危步雲閒啓深洞玲瓏天巧露僧居羅上下鐘聲蒼晨暮長嘯排翠靄圍碁驚振鷺陶寫屏絲竹恐爲風景汙拂蘚題蒼崖縱橫醉中句茲游豈易得載酒莫辭屢江西通志

善沛

善沛字濟世太宗七世孫淳熙二年進士終南康守

對雪

兒笑眞珠滿盤碎女疑荷葉雨中來道人心下無此事三箇柴頭品字煨名勝志

善倫

善倫字季思太宗七世孫

多景樓

壯觀東南二百州。景於多處更多愁。江流千古英雄淚。山掩諸公富貴羞。北府如今唯有酒。中原在望忍登樓。西風戰艦今何在。且辦年年使客舟。

梅磻詩話全篇警拔。江湖閒多稱之。或以爲劉改之詩誤矣。

善扛

善扛、字文鼎、號解林居士、太宗七世孫。

春詞

碧落初明月未收。露華香滴杏梢頭。玉闌干外東風軟。人在重雲第幾樓。詩家鼎鑪。

善訥

善訥、號復齋、太宗七世孫。

游大滌

黃簾有影金燈暗。碧殿無人玉磬清。我亦三生羽衣客。夢魂久已到瑤京。洞霄詩集。

善璪

善璪、太宗七世孫、家南海。

餞陳市峯之廉泉

桃源渺何處。夢短到家難。不辦一丘費。猶爲九品官。鶴嫌新俸薄。鷗訝舊盟寒。附翼攀鱗事。書生不敢干。

四朝詩

汝愚

汝愚字子直。太宗子。漢恭憲王元佐七世孫。居饒州之餘干縣。擢進士第一。光宗朝。累除同知樞密院事。寧宗朝。權參知政事。拜光祿大夫。右丞相。爲韓侂胄所忌。責授寧遠軍節度副使。永州安置。至衡州暴薨。後贈太師。追封沂國公。諡忠定。配享寧宗廟庭。

送汪尙書大猷歸鄞

尙書天官貴。持經侍幃幄。青冥欲無際。白首非故約。連檣動南浦。父老望巖壑。下車入里門。執手問歡樂。十年幾風雨。寒雞叫屋角。勤勞畢吾分。帝賚出寵渥。殊適奉香火。禁直連六閣。遂令宣室思。從今問晦朔。  
寧波府志

同林擇之姚宏甫游鼓山

在閩縣

幾年奔走厭塵埃。此日登臨亦快哉。江月不隨流水去。天風直送海濤來。故人契闊情何厚。禪客飄零事已灰。堪歎人生祇如此。虛闌獨倚更徘徊。  
鼓山志

致爽軒

濃陰夾道水流渠。吹盡殘花不復餘。唯有范家三畝竹。青青依舊色侵書。  
全蜀藝文志

汝談

汝談字履常。號南塘。太宗八世孫。居餘杭。淳熙十一年進士。累官至西外宗正。理宗時。歷給事中。

權刑部尚書卒。謚文懿。

後村詩話。本朝全盛時。宗室貴顯而負詩名者。有德麟。近歲有南塘兄弟。詩工而命窮者。自紫芝仲白而南塘。遂爲一代騷人之宗。

環錦亭臨安俞氏園

與子鄉鄰信有年。故王遺事到今傳。爽鳩邑改風烟在。散騎園分水竹偏。高架插書供夜讀。滿堂戲綵敵春妍。相如可是區區者。戲筆題詩亦偶然。咸淳臨安志。

翠蛟亭和鞏栗齋韻

幽亭枕蒼峽。雲竇通曲水。百折如建瓴。灑灑鳴不止。客來一抽鑰。白霧噴巖底。儵翁千丈蛟。擎空翠濤起。天開混沌窟。日洗盤古髓。諒匪畜池鱗。多應化雷尾。馮陵氣易壯。怖蕩辭難侈。術假金洞光。景逾瑤臺泚。誰云游方外。巧異縑塵裏。坡仙頗年數。覲而猶尺咫。采句貴自然。鞏言良是已。珍題豁靈界。篆出蕃君里。物生亦倚數。有形必有靡。道人亦多事。浮念何時死。余生嗜泉藪。痼疾牽硯几。太息動靜機。于何寄真理。醉倒和滄浪。煩君更詳此。洞霄詩集。

汝 諱

汝諱。太宗八世孫。居餘杭。慶元五年進士。

題翠蛟亭

百丈寒蛟下翠庭。幽人相對覺風生。闌干小倚飛觴處。一曲松風亂雨聲。洞霄詩集。



汝 鏞

汝鏞字明翁。袁州人。太宗八世孫。嘉泰二年進士。曾官漕帥。有野谷詩集。

劉後村跋云。明翁詩兼衆體。而又徧行吳越百粵之地。眼力益高。筆力益放。卷中歌行。跌宕頓挫。制蛟縛虎手也。及數爲五七言。則又妥帖麗密。若唐人鍛鍊之作。

小水寺

披霧入野寺。寒林響西風。誰遣僧出迎。山鳥爲我通。染衣松露香。照眼巖花紅。聊此息塵慮。歸騎毋怱怱。訪隱者不遇。

兩腋乘西風。送我上高岑。竹根一泉通。石徑萬木森。中有隱者居。敗屋莓苔侵。山空人不見。雲滿挂壁琴。兩鶴出候我。逢迎啄衣襟。應酬久頗厭。走避不可尋。誰伴山下去。明月升高林。

去婦詞

入得良人門。自誓終此身。掃室擁箕帚。進盥躬盤巾。采桑趨壠首。薦蘋潔澗濱。十年盡婦道。唯恐堂上嗔。上和下睦本無事。一旦小姑恣萋菲。浸潤旣深貝錦成。不棄不出譖不已。良人繯絙心。自知父母之命安。敢違舉頭天邊指。缺月暫缺須有團圓時。君不聞章臺長條依舊垂。樂昌半鏡還復歸。

舟中

繫纜停征櫂。斜陽古渡頭。風霜先遠客。天地獨扁舟。水鳥衝開浪。汀鴻占斷秋。在家貧亦好。何用出林丘。

送彥東還湘

湘南多爽處。羨子片帆還。秋影清涵水。烟痕淡著山。蘭風香楚佩。竹淚冷湘斑。見說誅茅地。江頭只數間。

劉簿約游廖園

名園新整頓。尊酒約追隨。春晚花飛少。牆高蝶度遲。注湯童煖酒。拍案客爭棋。寂寞千秋索。無人盡日垂。

舟中

離家俄十日。千里獨衰翁。篷響過雲雨。帆開逆水風。新沙增岸腳。小港隱蘆叢。客思難消遣。黃昏月一弓。

題合江亭

石鼓山頭一小亭。乾坤萬里眼雙明。雖因刺史能尋勝。不遇昌黎豈得名。衡嶽雲開天洗碧。蒸江湘合水爭清。書巖莫辨當時事。空積塵泥野草生。

自注昌黎題合江亭寄刺史鄒君詩末有願書巖石上勿使塵泥流之句。

懷亨父

兩年隻影瀟湘去。料想塵埃白髮侵。久雨千山秋得意。西風一雁客關心。或于夢裏陪談笑。每向人前問信音。憶昔賡詩巖桂下。花開今日歎孤斟。

以上野合集。

汝湜

汝湜號澹軒。太宗八世孫。居餘杭。嘉定元年進士。

敬和陳南渠先生九鎖步虛詞并引。按九鎖爲天關。藏雲。飛鸞。通真。龍吟。洞微。雲壑。朝元。凌虛。今存二首。

竊聞天秉陽德。而九爲老陽。故仙道宗陽。而取數皆九。內景含氣。以九爲節。金丹大還。九轉爲寶。其在于人。爰有九宮。上應列宿。是爲九曜。圓則九重。豈非陽數之極。而仙真所居者乎。天柱洞天。外環九鎖。

神造靈設，仰模璇霄。此固五帝真游，列仙窟宅之地也。山秀水清，鉤綿奇絕，飛舉之士，疇昔接踵。而我曾外祖寢虛先生，即陳留良實以童年傳道洞微，隱迹吳山，修鍊內丹，心樂此地。時與高人幽士，徜徉往來，浴冷泉而白雲生，寢石牀而丹氣炳，靈異之迹，不可具述。故舅氏南渠居士，猶踵清風，守一高蹈。暇日，因卽九鎖聲之步虛，用標靈境，以告來者。汝湜辛酉仲秋，因獲陪侍杖履，撫松拂石，卽景長吟，輒爾和韻，用污清唱之末，寄之名山，用識于他日也。

天關鎖

雲壙高嵯峨，七堦銜銅環。有象非有質，真儔得躋攀。九天著通籍，保我玉鍊顏。英英青旄節，悠悠款靈關。

龍吟鎖

矯首東方宮，變化何由尋。神用妙難擬，颯電赫森森。雨施不爲功，雲從本無心。人寰謾懷想，夏鉢希雷吟。

題洞霄

洞府日月閑，風景自清楚。九關啓天鑰，容我朝帝所。清緣宿仙館，夢破石泉雨。明朝得羊珠，試向張華語。  
以上洞霄詩集

汝 讜

汝讜字蹈中，號懶菴。汝談之弟，以祖蔭補承務郎，登嘉定元年進士，累遷司農丞，知温州。

題會春苑

草荒故苑幾春風，尚想花開春樹紅。欲問當時馬王事，寂寥殘照野亭中。  
後村詩話

翠蛟亭和鞏豐韻

衆峯抱蒼龍。蟠屈翠蛟水。放之兩崖閒。奔洶不得止。濤瀾生席上。雷電轉石底。恍疑天柱搖。將拔陰洞起。蘇公雄氣壓。詩骨得仙髓。指麾驅鯤鯨。赫變動其尾。紛紛下土人。蟻垤自封侈。驟觀目精眩。筆墜汗流泚。坐令空谷嘯。聲徹霄漢裏。君來松根吟。仙者相去咫。老蛟破鎖去。餘怒猶未已。決開澗千丈。散作霧五里。今年溪湖乾。草莽生意靡。寸泉落山苗。靈鑰起垂死。遺吾雲子飯。報汝青玉几。野人尋泉竇。筒壞方復理。泓然山巔池。冬夏常若此。洞霄詩集

汝回

汝回字幾道。永嘉人。太宗八世孫。嘉定七年進士。終主管進奏院。

凌霄花

孀孀枯藤淺淺葩。蚤緣直上照殘霞。老僧不作因依想。將謂青松自有花。全芳備祖

杜子野畱別

有朋不貴數。道合意自親。早知離別難。會覲豈厭頻。青燈書閣下。細語交情真。酌此武陽泉。饌彼松江鱗。兵庖復有攜。得非知我貧。如何不我醉。明日隔征塵。

宿羅溪山

鷺嶺東游霽景微。碧桃花外一鶯飛。樵夫不斫垂潭樹。知有僧人挂浴衣。以上東甌詩集

句

春風過後雪初白。夜雨晴時水亦香。橘花 屈原一點沈湘恨。李白三生捉月身。水仙 東甌詩集。

汝 迕

汝迕字叔午。一作叔魯。號寒泉。樂清人。太宗八世孫。

括溪倚舟

樹古半成槎。溪過歷歷斜。寒林欲無路。小塢不多家。去客背流水。停舟見暮鴉。朝朝省秋水。頻減一痕沙。

四聖觀納涼

琳宮暑自薄。短簾逸人眠。樹繁來時馬。風移聽處蟬。藥童清入畫。道士默如禪。忽憶山中雪。瘦梅逋老阡。

哭趙蹈中

族老今爲海內憐。清名多是布衣傳。一封表乞從師郡。千里神寒覓句年。水鏡照人前日政。雨絲吹旆別時船。離家憶值梅初白。梅未成陰失此賢。以上前賢小集拾遺。

汝 旗

汝旗。太宗八世孫。

宿山隱齋

平生悅山隱。一室容我借。弄泉掬明月。坐石延清話。既調松下琴。復作松風瀉。仙人擣藥禽。獨叫青山夜。

洞霄詩集。

汝 鑿

汝礬太宗八世孫

金陵作

龍虎帝王宅，鳳凰仙子臺。六朝遺事冷，八月夜潮回。隴雁秋仍到，江花晚自開。憑高一尊酒，何代獨無才。  
景定建康志

汝 楫

汝楫、太宗八世孫。居鄞。寶慶二年進士。史彌遠之壻。

鶴林寺

仙去當年尋舊迹，傳來此日尚名山。花開花落朝昏事，唯有春風歲歲閑。  
鶴林寺志

汝 鋌

汝鋌、太宗八世孫。

雪

病倦扶危坐，起看天雨花。蹇驢東野句，破屋玉川家。勇羨穿籬犬，飢憐噪樹鴉。龍山雲壑勝，冰柱憶劉叉。  
後村千家詩

汝 鐻

汝鐻、太宗八世孫。

浯溪中興頌

蒼崖插活溪。清漲溼元頌。費墨今屋高。千年此安用。鯨翻天寶末。雲滃朔方衆。還都迎上皇。嗚咽抱餘痛。兩宮重宴樂。萬國盡朝貢。當時紀成功。小雅見微諷。顏公發勁畫。金玉相錯綜。我于碑刻閒。衆羽得孤鳳。艱危人物難。忠烈鬼神重。摹取挂野堂。英風凜生凍。浯溪集

汝 唵

汝唵字仁山。號兩山。太宗八世孫。官臨安令。

離越

東關寒水深。游子別家心。權急波鳴枕。篷疎月在衾。半生多道路。何日定山林。隔岸聞漁唱。離騷不敢吟。

詩林萬選

棲真洞

幅巾灑松露。雙袖抖衣塵。可耐人閒暑。來尋洞裏春。座分雲骨冷。屐隱整紋新。鶴近清尊舞。如畱欲去賓。杭州府志

崇 滋

崇滋字澤民。號竹所。永嘉人。太宗九世孫。嘉定十年進士。

悼步月

雁過妝樓人不見。斷腸又是一黃昏。不知天上嬋娟影。能照人間寂寞魂。響屨廊深空認步。唾茸窗煖尙留痕。合將一把香酥骨。葬在巫陽雲雨村。詩家鼎鑪

客舍

巷深人寂靜，蜚守客牀鳴。半夜後風雨，一燈前弟兄。愁來無好夢，吟到有新聲。不信看雙鬢，蕭蕭白幾莖。

求酒趙評事

半老情懷睡不能，小簷霜月當寒燈。無人來問相如渴，敲碎梅花一夜冰。以上東甌詩集。

崇嶓

崇嶓，字漢宗，南豐人。太宗九世孫。嘉定十六年進士，官至大宗丞，有白雲臺。

閨怨

恨殺庭前鵲，難憑卜遠期。朝朝來報喜，誤妾畫雙眉。後村千家詩。

宮詞

小苑風酣雨露香，紅情綠意爲春忙。五雲獨遠瓊花夢，三十六宮清漏長。詩林鸞選。

遊金精山

飛泉灑靈雨，玉田闕青芝。中有神仙人，宛然姑射姿。天巧從古今，虛竇開牕扉。歲深語亦誕，目極神爲馳。我亦泉石人，夙昔夢見之。登臨悟三生，毛髮何森維。未脫區中緣，玉顏畏磷緇。仙春醉青桃，蘿風吹輕絲。凡事俱爾爾，居然駭癡兒。畱詩遺仙靈，詎解山中疑。金精風月。

凭遠亭在淳安縣後。

莎亭日日報平安，幽處依然絕往還。平野四圍天一幅，有人踏雪看南山。嚴州府志。



崇齋

崇齋，永嘉人。太宗九世孫。嘉定進士。

過楊子橋

一抹輕烟隔小橋。新篁褪籜籜兩三梢。惜春不覺歸來晚。花壓重門帶月敲。  
東甌詩集。

崇錡

崇錡，字元治，開封人。太宗九世孫。有鷗渚微吟。

尋真夕對

春雲弄月黃金絲。春山草木皆仙姿。松根對坐日西夕。羣峯當前列青壁。鏗鏗虛壑含古音。靜聽宛是商山吟。洞石微開月當戶。剪水弦冰心手語。

野園

野園對客無杯酌。共坐茅簷理釣車。片月漸低風露冷。隔牆山鬼嘯梨花。

仙思

水殿風清急景斜。靈君初下五雲車。碧羅寶扇雙題字。記是誰人詠落花。

都昌卽事

世事可無酒。春藤還有花。山雲欲到地。街鼓又催衙。風緊魚休市。官貧飯帶沙。天機不得問。暮色欲棲鴉。  
湖中

汀浦獵獵起涼颼。碧滿香中獨立時。機事兩忘吾喪我。扁舟吟過水仙祠。以上鷗渚微吟。

崇 皦

崇皦、太宗九世孫。嘗宰南安。

九日山送客次趙循州韻。

蒼松藏野寺。山以隱君靈。俯仰千年事。孤高九日亭。抗顏頭漸白。弔古眼猶青。有客耽幽討。吟情起鶴汀。  
南安縣志。

崇 森

崇森、太宗九世孫。

春暖

春晴多得兩三日。便覺暄于輕暑天。行客停鞭爭買扇。侍兒啓箚請收綿。把杯早自嫌溫酒。盥手相將喜冷泉。此去西湖已初夏。安排絺綌上湖船。後村千家詩。

崇 纘

崇纘、太宗九世孫。居餘杭。紹定五年進士。

游九峯

九峯元不鎖。俗駕自來稀。水石藏仙窟。烟霞護羽衣。夜猿窺月叫。曉鶴出松飛。擬結巢由伴。眠雲隱翠微。  
洞霄詩集。

必瓌

必瓌字玉淵號秋曉太宗十世孫家東莞登咸淳元年進士任南康縣丞文丞相開府于惠州瓌攝惠州軍事判官入元隱溫塘村有覆瓿集

避地惠陽鼓峯用徐心遠韻

收拾當年破敕黃山中蕙帳夢魂香風供松葉暖茶竈雲臥茅窗凍筆牀一雨鳴蛙亂深夜數聲啼鳥怨斜陽風塵浩蕩愁如海那得中山醉酒方覆瓿集

必范

必范號古一太宗十世孫桐江人月泉吟社第二十名自署學古翁

前題

一歲農功只在春夫夫婦婦幾艱辛青門舊有種瓜地綠野新添躬稼人早把牛衣教諸子欲修蠶具問良辰夜來谷口東風過只恐逢人問子真

評云此卷八詩一起一結中六篇分詠三春節序曲盡田園閒景態如元日云卜歲聊憑六壬課有生未識五辛盤元夕云幸有漁樵同此樂苦無車馬自相誼社日云幾點飛花芳徑雨一雙新燕荻簾風清明云菱白生苗藏蛤地桑黃含椹浴蠶天皆佳句也今全

錄其首篇

月泉吟社學古翁回詩賞劉云效休文之八詠知類農歌拔毛遂于衆中允高匠自矧謝池僅止五字而魯語尤戒多爲首而錄全思則過半恭惟執事雙桐政美五柳門深續雅道于一線之餘亦嘗其與尋吟盟于千里之外夫豈無人乃采艱辛之辭

特置次發之列。月泉分貺。雲壑懷慚。某夢斷釣天。心游樂地。視元穎可爲至寶。奚有于今。裁白苧而製深衣。于焉學古。

必拆

必拆、杭人。太宗十世孫。白雲社月泉吟社第三十名。自署愛雲仙友。

前題

一段佳山水。芳時事正。一作事妍。犢耕青燒雨。鶴臥碧桃烟。社老邀嘗煮。鄰僧伴摘鮮。莫嫌陶令拙。農圃得餘年。評缺

月泉吟社愛雲仙友回詩賞劄云。田園歸隱。夙欽彭澤之高風。筆視久荒。難得石湖之秀句。不慚鄙劣。冒爾擬騷。誤辱甄收。敢言奔殿。敬惟執事山林富貴。軒冕錙銖。釣月耕雲。詎輸製錦。傍花隨柳。雅稱調琴。可見知幾之老成。居然遠世而肥遯。適佳興。用拂清人。餌絲菜。釣江湖。貨元穎。買珠璧。此意古矣。其利溥哉。某溝壑餘生。泥塗下土。有懷農圃。靡就犁鋤。茲效顰唐士之五言。怡曠足周南之一轂。僅逃孫外。免媿盧前。自謂狂吟。思復青氈而遠矣。或云駝榜。會歌白苧以邀之。

必種

必種、東嘉人。太宗十世孫。

題梅山

一隱吳門訪北山。深憐漢鼎尙多艱。片言儻得回天聽。未必仙名滿世閒。梅仙事實

必漣

必漣字仲連。崇安人。太宗十世孫。有倚梅吟藁。

濯足

小橋坐濯足。澗狹水流急。源頭夜雨多。落花漾紅溼。崇安縣志。

齷之

齷之字子雍。魏王廷美五世孫。少學于陳無已。有句法。

春日

拂牀敲枕晝初長。好夢驚回燕語忙。深竹有花人不見。直應風轉得幽香。墨莊漫錄。

句

風生閭闔春來早。月到蓬萊夜未中。大觀初代府尹宋喬年上元應制。耆舊續聞。

公碩

公碩。浚儀人。魏王六世孫。餘杭令。

慶元四年五月再游洞霄宮。

舊時曾此覓仙緣。一別于今四十年。白髮重來嗟老矣。青山九鎖故依然。肩輿直入松閒路。洗耳還聽澗底泉。幽興未闌吟未就。半峯斜日下平川。洞霄詩集。

彥端

彥端字德莊。魏王廷美七世孫。乾道淳熙間。以直寶文閣知建寧府。終左司郎官。有介菴集。

壽皇太子 九月四日

日日龍樓問寢時。雞人未動漏聲遲。前星一點朝天帝。只有清臺太史知。  
子晉吹笙未是仙。阿丕橫槊少全篇。小吟青著梅梢句。一日東風四海傳。  
大安宮裏漆園椿。子榦孫枝葉葉新。今日四株高下碧。相承一樣八千春。  
光堯初御六龍天。上直維參大火躔。天意分明昌宋德。誕辰三世總丁年。

西湖志餘。淳熙中。孝宗及皇太子朝上皇于德壽宮。周益公詩云。一丁扶火德。三合鑿皇基。蓋高宗生于大觀丁亥。孝宗生于建炎丁未。光宗生于紹興丁卯。故也。陰陽家以亥卯未爲三合。

壽張守

堂堂天上張公子。龍劍分光自斗牛。海上忽歸槎萬里。雲間未放月中秋。才爲漢殿無雙手。恩到閩中第一州。亦有人言識仙骨。不知何日是封畱。以上聖宋名臣獻壽集。

壽皇孫

前星炳煥領孫星。環拱中天日兩輪。四葉重光同聖世。千秋佳節近生辰。本支秀茂旦復旦。典學熙明新又新。喜入威顏天一笑。壽觴分賜一枝春。合璧事類前集。

崇安道中

風柳疎無力。秋花冷不香。客情隨去燕。涼思起嘯蜚。地入閩山隘。天連越樹長。年年擣衣石。爲爾感征裳。  
詩林萬選。

玉眞臺

在德興縣治後。彥端爲令時作。

春色無窮巷。農鄉有太和。病嗟聞道晚。貧喜得閑多。徑草供徐步。鄰花護屢過。層臺宜抗榭。誰爲買烟波。

饒州府志。

彥假

彥假字顯父。魏王七世孫。居閩。慶元二年進士。

翠蛟亭和鞏栗齋韻

天下名洞天。有山必有水。餘杭山水窟。神仙所棲止。仙人乘雲去。玉蛟留潭底。至今雷雨夕。蛟睡時驚起。爪劈巖石裂。石罅滴乳髓。涓涓泉流出。半垂白鳳尾。風來琴筑響。月照纓絡侈。曲折納深池。徹底清且泚。築亭當澗衝。木石相表裏。翠壁潤含烟。層峯去天咫。道人幻出奇。指顧猶未已。忽驅蛟走鬪。瞬息八百里。怨氣挾奔霆。草木爲披靡。兒童驚震掉。面若槁灰死。達人本大觀。談笑自隱几。須臾羣動息。靜坐窮物理。水石本無心。相激一至此。

洞霄詩集。

致夫

致夫字仲禮。居鄞。魏王八世孫。觀文殿學士。彥逾子。紹熙四年進士。寶慶初。直祕閣。爲湖南憲。

題化成巖

塵世有仙境。清絕不可言。寒江露沙迹。曉嶂埋雲根。暇日推吏案。呵道穿僧門。來飲巖下水。何必攜芳尊。

袁州府志。

立夫

立天字德成。樂清人。魏王八世孫。開禧元年進士。官至刑部尙書。

臘日偶書

近日斗侵寅。南天雪不成。梅梢動生意。禽鳥弄春聲。鬢逐年華換。身資藥力輕。聽傳吳蜀事。對酒不能傾。  
東甌詩集。

潛夫

潛夫字景壽。號鶴所。黃巖人。魏王八世孫。嘉定十六年進士。寶慶初。監澈浦鎮稅。

弦風亭

怪他蟹舍螻房地。不是吟情住亦難。數尺短牆圍晝寂。半鉤疎箔障春寒。水生草滿蛙鳴合。日薄花陰鶴夢安。底處青衫病司馬。浩歌東望取琴彈。  
澈水志。

庚夫

庚夫字仲白。寓居興化軍。魏王八世孫。舉進士不第。以宗子取應。得右選。趙紫芝爲晚唐詩名冠。四靈而仲白亞紫芝。劉後村擇百篇爲山中集。并誌其墓。

劉後村跋。仲白于古體寓其高遠。于

大篇發其精博。于短章窮其要妙。

歲除卽事

宋詩紀事 卷八十五



連夜縫紉辦。今朝杵臼頻。買花簪穉女。送米贈窮鄰。宦薄唯名在。年華與鬢新。桃符詩句好。恐動往來人。  
瀛奎律髓

讀曾茶山詩集

茶山八十二。擢仙千首新。詩手自編吟。到瘴烟因避寇。貴登從橐只棲禪。新于月出初三夜。淡比湯煎第一泉。咄咄逼人門弟子。劍南已見祖燈傳。

梅壠詩話。紹興末。曾茶山下居于越。得禹迹寺東偏空舍十許間居之。手種竹盈庭。日讀書賦詩。其中公平生清約。不營尺寸之產。所至寓僧舍。蕭然不敵風雨。公詩有曰。手自栽培千箇竹。身常枕藉一牀書。蓋寓居時所賦也。公年雖高。吟詠猶不輟。莆田趙仲白讀公詩集。有詩云。蓋山陰陸務觀。實從公學詩。陸有劍南集行于世。故末句及之。

落魄

落魄蕉衫戴道冠。菖蒲滿案浸清寒。有錢即買丹砂鍊。無病猶將素問看。連日游山僧共住。頻年乞米鶴同飡。世間不朽非鍾鼎。曾與高人靜處觀。  
詩家鼎鑪

句

鶴殘籬外筍。鼠舐墨中膠。  
稍得 詩句日從窗眼寫。墨丸夜入枕頭收。  
寄僧 貴耳集

密夫

密夫號竹溪。魏王八世孫。晉江人。紹定二年進士。

三脫麪

筍蕈初萌杞藥纖。然松自煑供親嚴。周人食肉何曾鄙。自是山林滋味甜。山家清供。

瓚夫

瓚夫號巖雲。魏王八世孫。

寄林可山

好春虛度三之一。滿架茶蘼取次開。有客相看無可設。數枝帶雨摘將來。山家清供。

時伐

時伐。魏王九世孫。

種蘭

深林瘦徑傲朝昏。牙髮消疎氣骨存。九畹誰移炎海角。半庭新補冷雲痕。圃翁認葉非漳種。墨客知花是楚魂。從此國香春不斷。光風滿地長兒孫。後村千家詩。

時瓌

時瓌。魏王九世孫。丹陽令。

題陳少陽先生上書藁後

虜騎昔長驅。高屋建瓴水。權姦誤國家。和議甘飢餓。遂令九廟尊。冒沒在棘枳。帶甲百餘萬。一嘯自披靡。堂堂諫議公。屹若頽波砥。叩關斥時宰。不惜用一死。此死不足道。聞者自興起。一木支大廈。于時不可爾。

使早定大計。何物摩□壘。可憐紹興閒。賻贈官其子。我得覩遺橐。感慨寧已矣。千載凜如生。作者書于紙。  
盡忠錄附。

時儋

時儋、號竹所、魏王九世孫。

西禪餞董溪翁

西浦風寒水自流。迢迢行李又歸休。今宵古寺吟邊酒。明日長江客裏舟。溪路梅花催雪興。旗亭竹色伴雲愁。還家更爲明時出。莫向漁磯老釣鈎。  
詩林萬選。

時煥

時煥字元晦。晉江人。魏王九世孫。嘉定十二年進士。官廣東運判。

九日山送客

頻來因送客。攜酒訪仙靈。歸去成何事。重來媿此亭。天寬野水白。松潤石崖青。倚杖思今古。寒鷗落遠汀。  
南安縣志。

若楸

若楸字自木。號霽山。崇安人。魏王十世孫。咸淳十年進士。

武夷茶

石乳霑餘潤。雲根石髓流。玉甌浮動處。神入洞天游。  
高元潛茶藥。

卽事

雲散春山出。人閑白晝長。禽聲蒼空谷。樹影畫斜陽。種果期秋實。澆花趁晚涼。行藏天已定。隨分且徜徉。

遇樵川林時中

建水樵川隔幾重。相逢孰意大江東。客行芳草垂楊外。春在柔桑小麥中。細雨疏田流水碧。殘霞擁樹遠林紅。浮生聚散渾無定。有酒何妨一笑同。

暮春

香透蜂房。蝶夢殘。一簾新雨。又春闌。柳腰瘦得難禁舞。今夜東風。莫更寒。以上崇安縣志。

